

TUSI AOGA VASEGA AMATA 2
FEPUARI 05, 2023 – IUNI 25, 2023

ASO SA – FEPUARI 05, 2023

MATAUPU – “NA FAIA E LE ATUA LE LAGI MA LE LALOLAGI”

TUSI FAITAU – KENESE – 1: 1 - 31

SINI – Ia a’oa’oina tamaiti ia amata ona iloa ma maitau le amataga o le fa’agasolo o le faiga o le lalolagi i le amataga.

TAULOTO: KENESE – 1: 1 -2. *“Na faia e le Atua le lagi ma le lalolagi i le amataga. Sa so’ona nunumi le lalolagi ma ua gaogao, sa ufitia foi le moana i le pouliuli, na fegaoioia’i foi le agaga o le Atua i le fogatai.”*

FESOASOANI MO LE MATAUPU.

“Na faia e le Atua le lagi ma le lalolagi i le amataga” O nai upu ia ua amata ai tala o le Tusi Paia ma le Feagaiga Tuai, o lo’o fa’ailoa manino mai ai ia te i tatou, e le’i tutupu fua mea o i ai i le lalolagi. Ua manino mai i upu amata ia o le Tusi Paia, sa i ai le amataga o mea uma, a’o mea uma lava foi na faia, na foafoa e le Atua mamana. O le gaoioiga a le Agaga i le so’ona nunumi o le lalolagi ma le pogisa sa tele, na afua ai ona tu’u mavaevae mea uma i le ta’otoga lelei ma le manaia, e o’o mai i aso nei. O le fa’amatalaina foi e le tusitala o Kenese o le tala lea, ua matua lelei ona fa’agasolo lelei mai le amataga i le ulua’i galuega se’ia o’o i le tualuga o galuega uma, ***o le tagata ola*** lea. Ua manino i le tusi faitau galuega na faia i aso taitasi, e ala i le fetalaiga a le Atua, ona tutupu lea ma i ai mea uma.

FESOASOANI MO LE FAIAOGA

1. E le o se tala fou po’o se mataupu fou i lau Susuga a le faiaoga. Atonu foi o le a e fa’apea ane, ua fai so’o lea tala, ioe e moni lelei lau Susuga, ae ao pea ona silafia, o le amataga lea o tala o le Tusi Paia e ao ai ona a’oa’oina pea ia taofi ma mausali i le fanau.
2. E fautauina pea a outou Susuga ia fa’amalosi le faitau Tusi Paia a fanau i le vasega lea fa’amolemole, e amata ai le vaega taua lea mo i latou.
3. Ia fa’aaoga pea le Tusi Paia e fa’amatala ai le foafoaina o le lalolagi, ma galuega ta’itasi i lea aso ma lea aso, ina ia faigofie ai i le fanau ona iloa le fa’asologa o le faiga o le lalolagi.
4. Fa’amolemole Faiaoga, o le fesoasoani ua tu’uina atu e mo lau Susuga a le faiaoga, ae le o tamaiti. Ae sailiili pea i le gagana faigofie mo le fanau.
5. E matua fautuaina lava lau Susuga ina ia lava le lua mafutaga ma le tusi faitau o le mataupu i le vaiaso mol au tapenaga, o le a faigofie ai ona taofi e le fanau le gasologa o le tala.
6. E leai se manatu e fa’amamafa tele ni a’oa’oga i le vasega lea, ae o le fa’amamafa lava, ia tapena i latou ia iloa le tala i lona tulaga o loo I ai I le Tusi Paia. Ae aua le taofia pe afai ua e mautinoa e malamalama le tamaitiiti i se a’oa’oga e te taumafai i ai.

GALUEGA FA’ATINO –

1. Talu ai o le ulua’i Aso Sa lenei o Aoga o lenei tausaga, e lelei ai le amata malie i sina talanoaga pu’upu’u e uiga i le tu’uga sa feagai ai.
2. Fesili i tamaiti pe iai se isi o iloa le mea na tupu ia tatou Aoga Aso Sa i le tausaga ua te’a. A leai ona ta’u lea i tamaiti le taofia o aoga ona o le Koviti.
3. E umi le tusi faitau, ae onosa’i e a’oa’o ai le faitau a tamaiti. Ia fesoasoani e fa’asa’osa’o le ta’uga ma le fa’aleoina o upu ta’itasi e sese ona tau pe fa’aleo e fanau, a’oa’o foi le faitau i fa’ailoga, taofi le faitau ma fa’amalamalama se upu e te silafia e faigata i fanau i se uiga faigofie. Ia tofu le tamaitiiti ma le fuaiupu, o le to’atele o le vasega o le vave foi lena ona uma lea vaega taua ona fa’atino.
4. Tusi ma saunia se siata e lisi ai galuega o le foafoaga i aso e ono, mai le aso muamua e o’o i le aso ono.
5. E lelei tele ae taumafai lau Susuga e tusia ni ata po’o se ata e fa’ailoa ai i le fanau foliga o mea ta’itasi na faia i lea aso ma lea aso.
6. Ia tautuana ia a’oa’oina le tauloto ia uma ane le Aso Sa ua maua e tamaiti.

FA’AMAMAFI O LE MATAUPU – Ia ta’u i le fanau, o mea uma i le lagi ma le lalolagi, na faia uma lava e le Atua i le amataga.

PESE – Ia fa’ai’u i se pese e fiafia ai tamaiti, ma se tatalo e saunia e lau Susuga, ae fa’ata’ita’i i ai le fanau.

Manuia tele le galuega o lenei Aso Sa



ASO SA – FEPUARI 12, 2023

MATAUPU – “NA FAIA LE TAGATA I LE FA’ATUSA O LE ATUA”

TUSI FAITAU – KENESE – 1: 26– 31 / KENESE – 2: 7.

SINI – Ia a’oa’oina le fanau ia iloa ma malamalama, e tulaga ese le faiga o le tagata e le Atua, na faia le tagata i le fa’atusa o le Atua ia foliga ai i le Atua.

TAULOTO: KENESE – 2: 7. *“Ona faia lea e le Alii le Atua o le tagata i le efuefu o le ‘ele’ele, ma ua manava i ona poga’i isu o le manava ola, ona avea ai lea o le tagata ma tagata ola.”*

FESOASOANI MO LE MATAUPU –

E ui i le lelei saunia o le foafoaga o mea uma e pei ona tatou talanoa i ai i le vaiasao ua te’a, peita’i, e le’i atoatoa lava lea i le finagalo o le Atua. O le mea lea na ia finagalo ai ina faia se tagata e sili i mea una na ia faia . Ona fetalai ane lea o le Atua, Ina tatou faia ia o le tagata i lo tatou fa’atusa, ia foliga ia i tatou, ia pule foi i latou i i’a o le sami, ma manu felelei, ma manu vaefa, ma le laueleele uma atoa ma manu fetolofi uma e fetolofi i le elelele. Ona faia lea e le Atua o le tagata i le efuefu o le elelele, ma ia manava i ai i ona poga’i isu o le manava ola, ona avea ai lea o le tagata ma tagata ola. Ua silafia e le Atua o mea uma na ia faia, ua matua lelei lava, ona fa’ai’u lea e ia o lana galuega, ma malolo i le aso fitu. Ma ua fa’asaina lea aso e malolo

ai ma manatunatu ai tagata i le agalelei o le Atua atoa ma mea uma tatou te faia e ola ai. Tamaiti, e manuia le tagata e ava i le Aso Sa ma fiafia i ai.

FESOASOANI MO FAIAOGA:

1. E fautuaina pea le saunia lelei o lau Susugsa mo le mataupu, e ala i le lua mafutaga ma le tusi faitau i lau tapenaga o le vaiaso.
2. Manatua ia fa’amatala le tala mai le tusi faitau fa’amolemole, e gasolo lelei ai le mataupu.
3. Ia manatua pea aua nei galo, e le a’oa’oina i fanau se mataupu silisili, ae ia amata ona latou fa’amasani e fa’alogo i tala amata o le Tusi Paia.
4. Ia fa’afaigofie le gagana fa’amolemole ia vave maua ma malamalama le fanau
5. Io’o tele pea isi metotia i lau Susuga mo le mataupu ia faigofie, fa’amolemole aua le taofia.

GALUEGA FA’ATINO:

1. Ia fa’amasani le fanau i le a’oa’oina o le tauloto o le Aso Sa lenei, ma toe fa’amausali ai le tauloto o le vaiaso ua mavae, aua le tu’ua fa’amoleole ne’i galo.
2. Ia saunia e lau Susuga ni fesili faigofie talafegai mo le fanau e te mautinoa ai o lo’o tou o fa’atasi ma i latou i le mataupu.
3. Saunia le fanau e tusi i lalo le fa’asologa o le faia o le tagata e le Atua, e pei ona i ai i le tala. Mai le ulua’i galuega i le galuega fa’ai’u.

NAI FESILI E FA’AMAUSALI AI LE MATAUPU

1. O ai sa faia le lalolagi ma mea uma? Tali: O le Atua sa faia le lalolagi ma mea uma.
2. O ai sa faia le tagata? Tali: O le Atua lava.
3. Ua foliga tagata ia te ai? Tali: Ua foliga i le Atua.
4. Po’o le a le uiga o ia upu ua faia le tagata ia foliga i le Atua? Tali: O lona uiga ia foliga le tagata i le Atua, i lana amio, ia lelei i le soifuaga atoa.

A’OA’OGA – E lelei i lo’u manatau le fa’amamafa o fesili e fa’o lo’o i le galuega fa’atino e fai ai se a’oa’oga ta’ua mo le fanau, ia una’i i latou ia amata ona tauloto ma manatua pea.

PESE – E matua lelei i lo’u manatu ona a’oa’oina se fuaiupu o le pese #2 o le tatou tusi pese, e amata pepese ai fanau. Fa’ai’u ai loa i le tatalo a le Alii e fai fa’atasi

Manuia le alo atu i le tapuaiga.
////////////////////////////////////

ASO SA – FEPUARI 19, 2023

MATAUPU – “O ULUA’I MATUA, MA LE FA’ATOAGA O ETENA”

TUSI FAITAU – KENESE 2: 21 – 24.

SINI – Ia malamalama ma iloa e le fanau ulua’i tagata na faia e le Atua, mal e fanua lelei na tu’uina i ai e nonofo ai.

TAULOTO: KENESE – 2: 22, *“Ona fa’apea ai lea o Atamu, o le ivi lava lenei o o’u ivi, ma le a’ano o o’u a’ano, e ta’ua o ia o le fafine, aua na toina atu o ia ai le tane.”*

FESOASOANI MO LE MATAUPU:

Ua faigofie ona iloa e tamaiti igoa o le ulua’i tane ma le ulua’i fafine. O se mea lelei tele lea mo lau tapenaga o le a gasolo lelei ai le mataupu. O le fanua matagofie ma le lelei na tu’uina i ai e le Atua ulua’i tagata e nonofo ma galulue ai. Ua ta’ua le fanua i lona igoa o ETENA, o lona uiga **“o le fiafia”**. Ua ta’ua o le fiafia le fanua aua sa i ai la’au uma ma mea uma sa fiafia i ai tagata. Sa i ai foi vaitafe e fa sa fa’asusuina ai lenei fa’atoaga. O igoa nei o vaitafe e fa – o Pisona, Kaiona, Hitekulu ma Eufirate. E fa’apea le tala, masalo o le lau’ele’ele o Asuria sa i ai le fa’atoaga lea o Etena, peita’i, ua le iloa lelei i nei ona po le mea sa i ai lea fanua lelei.

Na tu’u e le Atua Atamu (**o le ‘ele’ele**), e leoleo ai ma galue ai i le fanua o Etena. A o le tagata o ia ua nofo to’atasi, e leai se tasi ua la mafuta fa’atasi ai. Ua alofa le Atua ia Atamu, o lea na ia finagalo ai e faia le fafine, *“o le ivi lava o ona ivi, ma le a’ano o ona a’ano”* Ua aumai le fafine ia Atamu ina ia avea ma fesoasoani e tatau ma ia. Ua fa’aigoa le ulua’i fafine o Eva, o lona uiga **“o le ola”** Aua o le tina o ia o tagata uma.

FESOASOANI MO FAIAOGA

1. E fautuaina pea le faitauina o le Tusi Paia aua le tu’ua fa’amolemole i Aso Sa uma. Ia mautinoa e fa’amalamalama ni upu e faigata i tamaiti
2. O lau tapenaga lava i le vaiaso o le a faigofie ai le mataupu ma malamalama lelei ai le fanau.
3. Ia taumafai lava e silasila i le mataupu ma fa’amalamalama i le fanau le sini o lo’o aga’i i ai le mataupu ina ia le felefele.
4. Ia saunia ni fesili faigofie e fesiligia ai tamaiti ina ia mautinoa ua malamalama i le mataupu.
5. Fa’amalamalama upu ma o latou uiga e te tau ane ai i lau tapenaga, ia iloa e le fanau ma taofi mau.

GALUEGA FA’ATINO:

- 1) Ia vaelua le vasega i tama ma teine, ona tu’uina lea i ai o le 7-minute e tali ai fesili nei –
 - i) O ai na muamua fausia e le Atua.?
 - ii) O ai le uluai tane ma le uluai fafine?
 - iii) O a uiga o la igoa?
 - iv) O fea na nonofo ai?
 - v) O le a le uiga o le igoa o le fanua lea?
 - vi) Afai e lava le taimi ona fa’aopopo lea o nisi fesili aoga e lau Susuga fa’amolemole.
- 2) Tau mai igoa o vaitafe na fa’asusu ai le fa’atoaga i Etena?
- 3) Aisea na avane ai le fafine ia Atamu?

A’OA’OGA – O le fa’amoemoe lava mo mataupu a le fanau lea, ia amata ona taumafai ia mautu lo latou iloa ma le fa’alogo pea i tala o le Tusi Paia, a’o aga’i atu i luga e fa’alatele ma fa’aloloto ai. O le mea lea e taua lava le saunia pea o lau Susuga i lea vaega ina ia mautinoa o pu’epu’e maua e le fanau tala amata ia o le Tusi Paia.

PESE – Fa’amolemole saunia se pese mo le fanau e fa’ai’u ai le mataupu o le aso, ona fa’ai’u lea e lau Susuga i se tatalo .

Manuia le Aso Sa, alofa atu



ASO SA – FEPUARI 26, 2023

MATAUPU – MATAUPU FA’AMANATU

SINI – O le fa’amoemoe o le Aso Sa lenei o le toe asia o mataupu uma sa a’oa’oina i lenei masina, ina ia toe fa’amanatu ma toe polili i fanau ina ia manatua ma taofi ia i latou, ma silafia ai e a outou Susuga le tulaga o lo’o aga’i i ai lo outou tautiga mo fanau ma le galuega o lo’o outou gapatia ai.

FA’ATINOGA O LE MATAUPU:

1. O le a tu’uina atu lava i lau Susuga a le faiaoga le tapenaga mo lenei Aso Sa ma le fa’agasologa o fa’amanatu mo le fanau.
2. Ou te iloa lava o le faiga masani, o le faia lea fa’a-suega, ua lelei tele lea pe afai o le na lou fa’amoemoe. Pule lava lau Susuga i le fa’atinoina, pe tali gutu ia pe tusi foi, e fua lava i le mafai e faigofie i tamaiti.
3. O le a tu’uina atu i lau Susuga le saunia o fesili mo le matupu lenei, ina ia talafegai lelei lea ma lo outou gapatia i le a’oa’oina o le fanau. Ae fa’amolemole ia mautinoa e o tutusa uma tamaiti i le taofiina o tala sa latou a’oa’oina.
4. Afai e i ai se isi auala e fa’amanatu ai mataupu ia, fa’amolemole aua le taofia.
5. Ia toe fa’amanino i fanau pe a uma ona togi a latou tali ina ia mautinoa ai tali sa’o o le a saunia.
6. Afai e talafegai le taimi, ia fai se ta’aloga e toe fesiligia ai a latou tali ma fa’ama’ea ai loa le fa’atinoga o lenei masina. E leai se tapu o se aisakulimi mo outou ma tamaiti pe afai e maua.

FA’AMANATUINA O TAULOTO:

O le vaega lenei, e tatau foi mo le fanau le fa’amanatu pea ia aua le tu’ua. Ia auaua’i ane a latou tauloto sa a’oa’oina, ia fa’amanatu ma u’una’i pea i latou ina ia fiafia e a’o ma tauloto a latou tauloto i o latou taimi avanoa i le aiga. Ia fautuaina foi i latou ia fiafia e faitau a latou Tusi Paia i aiga.

FA’AMANATU MA FA’AMALOSI:

Ua i ai lava le talitonuga i a outou Susuga i le fa’atinoga o la tatou galuega. E talitonu lava le taofi, o le tele o metotia ma faiga tatou te momoli ai tala i fanau ia, o le a mafai ai ona saunia i

latou e malamalama ma manatua i le lumana'i ma faigofie ai ona latou fa'auigaina ma a'oa'oina ai i latou.

O le taua lava lea o le fa'amatala ma toe fa'amatala tala amata i le fanau i lo latou tutupu a'e. E pei ona taumafai atu, e leai se fa'amoemoe e vave ona fesiligia i latou i se latou fa'auigaina o tala o le Tusi Paia, ae ua manatu lava ina ia iloa ma amata ona fa'alogo ma faitau i ai mo le lumana'i. E fa'amalosi atu ai i a outou Susuga ina ia tatou onosa'i e sailiili auala faigofie e fa'ailoa atu ai tala o le Tusi Paia i le fanau. Ia fa'amanuia tele atu le Atua i a outou Susuga ma le galuega o lo o gapatia ai. Fa'afetai le lagolago mai.

PESEPESEGA – la faia ni nai pese e fa'auma ai galuega o lenei masina. E fautuaina foi nai pese o le tatou tusi pese e fa'amasani ai le pepese a tamaiti.

TATALO FA'AI'U: Saunia e lau Susuga a le faiaoga se tatalo e fa'ama'ea ai le aoga, ma talosia ai le sauni atu i le tapuaiga.

Fa'afetai le onosa'i i lenei masina, alofa tele atu.



ASO SA - MATI 05, 2023.

MATAUPU - O LE LA'AU E ILOA AI LE LELEI MA LE LEAGA

TUSI FAITAU – KENESE – 3: 1 – 3.

SINI – O le a'oa'oina lea o tamaiti ina ia malamalama atili i le amataga o le ulua'i agasala, ma ia fa'amamafa ia i latou le igoa sa'o o le la'au o lo'o i ai i le Tusi Paia, ae 'alo'alo 'ese mai le igoa o lo'o fatu.

TAULOTO: KENESE – 3: 3. *“A o le fua o le laau o lo'o i totonu o le fa'atoaga, na fetalai mai ai le Atua, aua ma te a'ai ai, aua foi ma te papa'i atu i ai, ne'i ma oti.”*

FESOASOANI MO LE MATAUPU:

Na tu'uina atu e le Atua le tane ma le fafine i le fanua i Etena, la te leoleo ma galulue ai. Na tu'uina atu foi ia te i laua le fa'atonuga, ina ia aua pe fa'asa ona pa'i atu i le la'au o lo'o i totonu o le fanua, o le la'au e iloa ai le lelei ma le leaga. Ua fa'atagaina i laua ina ia a'ai i la'au uma o le fa'atoaga, ae tasi lava le la'au lea ua fa'asa ona a'ai pe pa'i atu i ai, o le la'au lea ua igoa o le la'au e iloa ai le lelei ma le leaga. O fua o le la'au lea ua fa'asaina e le Atua, ua ia fetalai atu i le tane ma le fafine, aua lua te a'ai ai, aua foi ne'i papa'i atu i ai, ne'i lua oti. Ua le mafai ona iloa pe fia ni aso na 'ana'ana pe usita'i ai Atamu ma Eva i le fa'atonuga a le Atua. E tasi le mea ua manino mai tamaiti i le tala, ua o'o ina le ususita'i i laua ma solia le fa'atonuga a le Atua, ua tupu ai le malaia tele

FESOASOANI MO FAIAOGA:

1. Ia fa'amatala le tala e pei ona i ai i le Tusi Paia, a ia fa'aaogaina le gagana i upu faigofie o latou uiga i le fanau.
2. Ia fa'amamafa i le fanau le igoa o le la'au o lo'o taua i le tala, ae fa'amolemole e le o le igoa o le la'au o le apu po'o se isi lava la'au. Ua taumafai atu ina ia a'oa'oina lelei a tatou

fanau i upu sa’o ma igoa sa’o o lo’o ia i le Tusi Paia, ae tau taofi le mulimuli i upu e le o i ai i le Tusi Paia.

3. Manatua e fa’amanatu atu pea le faitauga o le Tusi Paia ia lava se taimi e faitau ai tamaiti ma fa’asa’osa’o e lau Susuga le fa’aleoga ma le ta’uga o upu .
4. Ia fa’amalamalama ni upu e faigata ona iloa e tamaiti, ma manatua e sili foi ona lelei le a’oa’oina pea o a latou tauloto.

GALUEGA FA’ATINO:

1. E manatu e fai pea ma toe tepa i tua la tatou galuega, ina ia mautinoa o lo’o mulimuli malamalama ane si fanau i lo outou tautiga.
2. Ia fai pea ma toe fesili i ai i tala o le masina ua te’a e fua i ai lau a’oa’oga. E manatu foi ina nei maumau lou tautiga ae leai se a’oa’oina o maua e tamaiti.
3. le galuega o lenei Aso Sa e fa’apea – “Tusi e lau Susuga le fa’atonuga a le Atua ia Atamu ma Eva i se siata, ona auaua’i ane lea o le vasega e tofu le tamaitiiti ma sana igoa o so’o se la’au ma tusi i se lisi i lalo ane o le fa’atonuga. Ia maitauina e lau Susuga pe mata e i ai se tamaitiiti na tusiina le igoa o lo’o fa’amamafa e le tatou mataupu.
4. Afai e uma ane e le tusiaina e se tamaitiiti le la’au e iloa ai le lelei ma le leaga, ona toe fa’amanatu loa lea i ai ma fa’amamafa i ai le a’oa’oga lena, o le igoa sa’o o le la’au o le la’au e iloa ai le lelei ma le leaga, ae le o se apu.

GALUEGA FA’ATINO LUA

Ina ia mautinoa le taofi e le fanau o le tala, ia tofia ni tamaiti e fa’atalanoa le tala i le talanoaga o lo’o aumai ai e le tala. Ia fa’aaoga upu o le talanoaga o lo’o i ai i le fuaiupu – 1 - 5, e talanoa ai tamaiti, sui tulaga e le fanau tagata o lo’o talanoa i le tala.

A’OA’OGA – E pei lava ona taumafai atu e fua e lau Susuga ni nai a’oa’oga faigofie mo tamaiti, a’o le fa’amoemoe lava ia fa’amasani i latou i igpa ma tala o le Tusi Paia.

PESE – Afai e le’i saunia sau pese mo le mataupu, o le fautuaga lava ia fa’amasani tamaiti i pese o le tatou tusi pese. Fa’ai’u i se tatalo e tu’ua ai.

Fa’afetai le onosa’i, manuia le Aso Sa.

////////////////////////////////////

ASO SA - MATI 12, 2023

MATAUPU – “O LE FA’AOSOOSOGA”

TUSI FAITAU – KENESE 3: 1 – 6.

SINI – Ia malamalama ma manatua e le fanau le tala i le fa’aosoosoga na mafua ai ona pau’u Atamu ma Eva.

TAULOTO – KENESE – 3: 4 - 5. *“Ona fai mai lea o le gata i le fafine, lua te le oti lava, aua ua silafia e le Atua, o le aso lua te a’ai ai, e pupula ai o oulua mata, ona avea ai lea o oulua e pei ni atua, o lo’o iloa le lelei ma le leaga.”*

FESOASOANI MO LE MATAUPU –

E fa’apea le tala, a’o galue le Atua i le faiga o le tagata, a’o le taimi foi lea o lo’o matamata lelei ane lava foi i ai le fili e to’atasi o le Atua ma mea lelei uma. Tamaiti, ua ta’ua lenei fili o le Atua i le tusi o Kenese, **o le gata**, ua fa’aigoaina foi i le igoa o **satani** (o lona uiga – **o le ita mai**), ma le **tiapolo** (o lona uiga – **o le tu’ua’ifuaina**). Fai mai le tala ua fa’alatalata ane le gata i le fafine ma fesili atu i ai, E moni ea na fetalai atu le Atua, lua te le a’ai i la’au uma o le fa’atoaga? Ona tali ane lea o le fafine, o la’au uma o le fa’atoaga ma te a’ai ai lava, a’o le la’au e tasi ua fa’asa aua ne’i ma a’ai pe pa’i atu i ai, **o le la’au e iloa ai le lelei ma le leaga**. Aua o le aso ma te a’ai ai pe papa’i foi i ai, o le a ma oti ai. Ona fai atu lea o le tiapolo, lua te le oti lava, aua ua silafia e le Atua, o le aso lava lua te a’ai ai i le fua o le la’au, o le a pupula ai o oulua mata, o le a avea oulua e pei o ni atua, o le a iloa le lelei ma le leaga.

FESOASOANI MO LE FAIAOGA

1. Iau tapenaga lava o le vaiaso o le a tele ai le ‘oa ma le tamaoaiga mo si fanau.
2. le fa’amatalaina o le tala i le siufofoga e malamalama gofie ai ma ni galuega mo tamaiti.
3. Ia matua fa’amalamalama upu e le iloa e tamaiti, ma faitau ina ia manino le fanau i le fa’aleoina o upu ma fa’ailoga.
4. Fautua i tamaiti ia tusi i a latou api upu ma o latou uiga ina ia mafai ona toe faitau i le fale.
5. Fa’amolemole aua le taofia nisi auala lelei e te silafia e malamalama ai le fanau, ma taofi mau ai i le mataupu o lenei aso.
6. Ia fa’amamafa pea ma tulituliloa le ulutala o le mataupu, aua le popole o lo’o auaua’i atu pea le soso’oina atu o ia tala.

IA SILAFIA:

Afai e te silasila ane e foliga tutusa i iau maitau le mataupu o le Aso Sa ua tuana’i ma lenei Aso Sa, fa’amolemole taga’i ane i sini o mataupu, o le a faigofie ai ona e silafia le fa’amamafa o ia mataupu. A’o mataupu e lua o lo’o i ai i le tusi faitau e tasi, peita’i, ua vaevae atu ina ia faigofie ai la tatou galuega. A’o se faiga lelei pe a ma’ea ane ua tu’ufa’atasi vaega e lua o le tala, ona iloa ai lea e le fanau.

GALUEGA FA’ATINO –

Fa’afeso’ota’i upu o lo’o i le lisi A, I o latou uiga sao I le lisi E.

A. Lisi o Upu
1. gata

E. O uiga o upu
(a). O le fiafia

- | | | | |
|----|---------|------|---------------------|
| 2. | satani | (e). | O le fili o le Atua |
| 3. | tiapolo | (i). | O le ola |
| 4. | Etena | (o). | O le 'ele'ele |
| 5. | Atamu | (u). | O le ita mai |
| 6. | Eva | (f). | O le tu'ua'ifuaina |

TALI MO LE GALUEGA. (1 = e), (2 = u), (3 = f), (4 = a), (5 = o), (6 = i)

Afai e lava le taimi ia toe fa'aopoopo nisi fesili i le mataupu ina ia mausali atili le iloa o le fanau fa'amolemole.

GALUEGA FA'ATINO LUA

Ia taumafai loa lau Susuga e tu'ufa'atasi le talanoaga e pei ona amata i le vaiaso ua te'a se'ia fa'auma i le faitauga o le Aso Sa lenei.

A'O'A'OGA:

Ia fa'amamafa i fanau ni nai a'oa'oga faigofie mo i latou i lenei vaega o le tala ua tatou o'o mai i ai. Ae tautuana ia fa'amamafa pea le tala ma lona sini autu i lenei taeao, o lo'o faasolosolo atu pea le tatou tala.

PESE - E fa'amoemoe lava o lo'o tapenaina se pese mo fanau fa'amolemole. A ma'ea ona fa'ai'u lea i se tatalo e se tama e foliga matua i le vasega e fa'ata'ita'i ai.

Malo le galulue, manuia le tapuaiga o le Aso Sa.



ASO SA - MATI 19, 2023

MATAUPU – “UA PAU’U ATAMU MA EVA.”

TUSI FAITAU – KENESE – 3: 7 – 13.

SINI – Ia a'oa'oina tamaiti ina ia amata ona 'alo'alo 'ese mai fa'aosoosoga, aua e taunu'u atu i le leaga ma le malaia.

TAULOTO – KENESE – 3: 8. *“Ua fa’alogo i laua i le siufofoga o le Alii le Atua o lo’o savali i le fa’atoaga i le ituaso e agi malie mai ai le matagi, ona lalafi ai lea o Atamu ma lana ava ai luma o le Alii le Atua, i la’au o le fa’atoaga.*

FESOASOANI MO LE MATAUPU –

O le mea ua tupu i le fa'aosoosoina e le gata o Eva, ua to'ilalo ai o ia po ua faia'ina i le tiapolo, ma ua ta'uvalea ai le alofa ma le agalelei o le Atua ia te'i laua. Ua lelei ma suamalie upu a le tiapolo ua ia fa'auiga sese ai le agalelei o le Atua ia Atamu ma Eva e fa'apea, o le ita o le Atua ia i laua ua fa'asa ai le la'au e tasi i le fa'atoaga ona la'ai ai. O le togafiti poto lea a le tiapolo po'o le gata na faia'ina ai Eva ma ioe loa lona loto e fai le mea manaia lea ua fai mai ai le gata. Ua ia gaua'i i le fa'aosoosoga ma ua va'ai atu i le la'au, e lelei lava pe a 'ai, ma ua matagofie mai, o le la'au foi e aoga e maua ai le poto, ona tago ai lea i le fua o le la'au ma 'ai ai, ua ia avatu foi i lana tane, na 'ai ai foi o ia. Tamaiti, ua le usita'i ma le talitonu i le Atua ma lana fa'atonuga, ua fia

avea i la'ua e pei ni atua. O le i'uga tamaiti o le fa'aosoosoina o i laua, ua pupula o laua mata i le leaga, ua leai se fiafia e tupu i o la loto, ua na o le maasiasi ma le ma, aua ua le pei o ni atua, a ua le lavalava. Ua leai lava se fiafia ina ua pau'u i le fa'aosoosoga, ua na o le ma, ma le loto leaga, ma ua fefefe i le Atua, e pei o le fefe a le pologa i le matai saua.

FESOASOANI MO LE FAIAOGA –

Tautuana lava lau tapenaga o le vaiaso ia faato'ato'a ona fai. E fa'amoemoe lava ua maua lelei le gasologa o le tatou tusi e pei ona taumafai atu ai, ina ia maua lelei e le fanau le atoa o tala o lo'o fa'agasolo atu. Ia manatua pea le faitau Tusi Paia ia fa'amalosia mo tamaiti, e leai se afaina pe afai e sili atu le faitau a le fanau i le faitauga ua tu'uina atu mo mataupu. O le fa'amoemoe lava ia mautinoa o le a le afaina le faitau tusi a le fanau lea a'o aga'i atu i luga a latou vasega. Manatu e le lelei se tamaitiiti ae leaga sana faitau Tusi Paia pe a matua. Fa'amanatu atu foi ina ia fa'amatala uiga o upu fou e le malamalama ai le fanau i le gagana faigofie o aso uma i aso nei. Manuia le tapenaga.

GALUEGA FA'ATINO:

Ia taumafai e fa'amanino i ni fa'atinoga le upu **fa'aosoosoga** i le fanau e ala i le fa'aaogaina o tamaiti o lau vasega. Ia auaua'i taito'alua pe taito'atolu ane i luma le fanau. O le galuega a le tamaititi o le taumafai lea e fa'aosooso le isi tamaitiiti ina ia faia se mea sese. A'o le isi tamaitiiti, e taumafai e te'ena. Ia maitauina lelei e lau Susuga upu o le a fa'aaogaina i le fa'aosoosoga ma tali mai, e le afaina pe talia pe leai, a'o le mea ia maitauina o upu. A ma'ea lea ona momoli loa lea o le feau taua o le mataupu, i le leaga o le faia'ina po'o le talia o le fa'aosoosoga I mea leaga ma lona i'uga e pei ona taumafai atu ai i luga.

GALUEGA FA'ATINO LUA:

Ia taumafai pea lau Susuga e tu'ufa'atasi mataupu uma e tolu o lenei masina ua ma'ea I le Aso Sa lenei, ina ia gasolo lelei ai le tala lea o lo'o taumafai atu lava e vaevae atu mo le faigofie ona manatua e tamaiti.

A'OA'OGA:

Aua nei taliaina se fa'aosoosoga a isi tamaiti ma isi tagata pe a e iloa e leaga, ae sili lava le aua e te fa'alogi i na mea pe a e le iloa le mea e tupu mulimuli mai ai. Aua e na o le ma ma le fefe, atoa ai ma le fa'avalevaea le mea e maua ai. Fa'aopoopo e lau Susuga nisi a'oa'oga aoga mo tamaiti.

PESE – E i ai pese a le Aoga Aso Sa e lelei mo le mataupu lea, tapena ane fa'amolemole mo le fanau. Fa'ai'u i se tatalo a se tamaita'i o le vasega.

Manuia tele le alo atu i le Tapuaiga o le Aso Sa.

////////////////////////////////////

ASO SA - MATI 26, 2023

MATAUPU – “O FA'ASALAGA MA LE FA'AOLA UA FOLAFOLAINA”

TUSI FAITAU – KENESE – 3: 14 - 24

SINI – la manatua pea ma mlamalama tamaiti i fa’asalaga o ulua’i matua ma le folafolaina o le fa’aola e fa’aolaina tagata o le lalolagi.

IA SILAFIA:

O le a leai se mataupu fa’amanatu o lenei masina i le Aso Sa mulimuli lenei e pei ona masani ai. Ua manatu o le a fa’ama’ea atu ai le tatou tala fa’asolo o lenei masina, i le mataupu lava lea o le Kenese 3, ma e tu’ufa’atasia ai loa le tala mai le amataga, o lo’o aofia ai mataupu uma o lenei masina. O le a leai foi se tauloto a le fanau, ae fautuaina lava le faitauaga Tusi Paia ia faia pea fa’amolemole.

FESOASOANI MO LE MATAUPU:

E ui lava ina ua pau’u ma faia’ina Atamu ma Eva i le fa’aosoosoga a le tiapolo po’o satani, e le’i mavae pe uma ai le alofa o le Atua ia i laua. Sa alofa pea i ai le Atua aua o le Atua o le alofa lava ia. Aemaise e le iloa e i laua, e leaga le le ususita’i i le Atua ma fa’alogo i lona siufofoga e fa’atonu mai ai i tatou. Peita’i, na a’oa’i pea e le Atua i laua e ala i sala na tu’uina i ai e le Atua, ina ia toe fa’afou ai le olaga. O le alofa o le Atua e fa’asala ai le tagata, ae le o lona to’asa (ita). **O le fa’asalaga lenei o Eva** – *E fanau ana tama ma le tiga, e ua’i atu lona mana’o i lana tane, e pule foi o ia ia te ia.* **O le sala a Atamu** – *E malaia le lau’ele’ele ia te ia, o le a tutupu ai la’au tuitui ma la’au talatala, e ‘ai ana mea’ai ma le afu o ona mata, i le ma lona ola i lalo nei o le a i’uvale, e le ola pea o ia, ae vave oti.* (Kenese 3: 16 – 19, Roma 5: 12). Tamaiti, e le fa’apea na manumalo le gata i le fa’aosoosoga, ona sili ai lea, e leai, **o le fa’asalaga o le gata** – *E sili lona malaia i manu vaefa fanua uma ma manu vaefa uma o le vao. Ua fa’apea mai foi le Atua, ou te fa’atupuina le faitaga’i ia te oulua ma le fafine, po o lau fanau ma lana fanau, na te tu’imomomoina lona ulu, a’o oe na te tuimomomoina lona mulivae.* **O Iesu ua ta’ua i lenei upu, (Kalatia 4:4) O le na te tuimomomoina le ulu o le gata, o le galuega lea a Iesu, na ia fa’atoilaloina ai le tiapolo, ma na lavea’iina ai tagata agasala i le togiola na ia faia. (Kenese 3: 13 – 19).**

FESOASOANI MO LE FAIAOGA

E leai se fesoasoani e sili atu i lo le tapenaga a lau Susuga. O le ala lea e soso atu ai lava i le loto maulalo ina ia tautuana ane si vaega taua lena fa’amolemole. Ua manatu o le a vasa’i a tatou mataupu fa’amanatu i lenei Aso Sa, ona o le manatu ia ma’ea lelei le fa’agasologa o le vaega lea o a tatou tala e pei ona taunu’u ai i le folafolaina o le fa’aola, ma aga’i atu ai loa i le suiga o tala i le vaiaso fou e amata i le tala o le laupama. O le mea lea ia aua ai nei fa’asea mai fa’amolemole ae tatou galulue fiafia mo nai a tatou fanau. Manuia le mataupu o le lenei Aso Sa.

GALUEGA FA’ATINO:

Ia galulue i ni vaega taito’alua pe taito’atolu. Ia tusi e i latou fa’asalaga o Eva, Atamu ma le gata i lona fa’asologa e pei ona taua i le tusi faitau. Ia amata mai le muamua e o’o i le mulimuli. O le fa’amoemoe, o le a faigofie ai e tamaiti ona maitauina mea taua ia o le tala. A ma’ea ona tusi a latou galuega, ona auua’i ane lea e fa’aali ma ta’u i le vasega. Fa’amolemole fesoasoani i nai tamaiti, ae aua le vave ta’uina i ai le tali. Manatua lava e tataua lava ona fai ni nai fesili e fa’amalamalama atili ai le mataupu fa’amolemole. E lelei ona fa’aaoga pea le Tusi Paia e galulue ai tamaiti.

GALUEGA FA'ATINO LUA

E lelei ona fa'aaoga loa se taimi o totoe, e tu'ufa'atasi ai loa le tala mai le amataga i le mataupu atoa lenei o le Kenese. O le galuega fa'amanatu lava lena o le nei masina. Fa'amolemole ia fa'atino le talanoaga i le tala ma ni nai fesili e fa'amausali ai. Ia tofia ni tamaiti e fa'atinoina le tala.

A'OAO'OGA:

E pei lava ona soso atu o le a ta'oto atu lava i a outou Susuga le vaega lea, ina ia mautinoa e fetau lelei lau tapenaga ma le a'oa'oga ua e manatu e tatau mo le fanau fa'amolemole. A o le fa'amamafa lava ia amata ona maitau e le fanau si tala lea mai lona amataga, e toe fa'aaauu pea mo nisi foi fanau e aga'i a'e i luga i le vasega lea.

PESE – E lelei ona toe fa'amanatu pese ua uma ona usu. Ae le taofia ai foi pe afai o e tapena pea mo ni pese i lea Aso Sa ma lea Aso Sa. Malo le tapena.

Manuia le Aso Sa, alofa atu.



ASO SA - APERILA 02, 2023. (“ASO SA LAUPAMA”)

MATAUPU – “OSANA I LE ALO O TAVITA”

TUSI FAITAU – MATAIO – 21: 1 – 8 / LUKA – 19: 38

SINI – Ia a'oa'oina pea tamaiti ia iloa le tala o lenei aso, ma le tali a tagata na fa'atalia le malaga atu o Iesu i Ieruselema.

TAULOTO – LUKA 19: 38. *“Ia manuia le tupu o lo'o maliu mai i le sua'fa o le Alii, o le manuia i le lagi, o le vi'iga foi i mea aupitoaluga.”*

FESOASOANI MO LE MATAUPU –

O le Aso Sa lenei ua masani ai i tatou ma le 'au fa'atuatua uma i le lalolagi. O le Aso Sa o le laupama e pei ona iloa ai, o le aso o le malaga atu o Iesu i Ieruselema, a'o faatali mai ai e tagata ma latou alalaga ia te ia o le tupu o tagata lutaia. O le amataga foi lea o lenei vaiasosa taua mo i tatou, ua ta'ua o le vaiaso paia. (E leai se afaina pe afai e te fa'ailoina faigofie i le fanau le uiga o lenei vaiaso). O le malaga atu o Iesu i Ieruselema ma o'o ai ina maliu (oti) ai. A'o le tala i le taeao nei, o le tala masani lava o lo'o fa'amaumauina e le 'au fai-evagalia, i a latou molimau i le tapenaga o le malaga se'ia o'o ina taunu'u i Ieruselema, o lo'o fa'atali mai ai tagata o lona nu'u. Fai mai le tala, ua o'o i le taeao o le aso muamua o le vaiasosa, o le vaiaso lenei a'o lumana'i ai le maliu o Iesu i le aso Faraile, ua maliu atu ai Iesu i Petefake. Ona ia 'auina atu lea o ona so'o e to'alua ina ia tatala ma ta'ita'i ane ia te ia le asini ma lana tama o lo'o nonoa i le a'ai. Ua ia fa'apea atu foi i ona so'o, afai ae fesili ane se tasi ia te oulua pe aisea lua te tatala ai le asini, ia lua tali atu iai, e mana'o i ai le Alii, ona tu'u mai loa lea e ia, ma laua ta'ita'iina atu loa ia Iesu. Ona amata loa lea o le malaga aga'i atu i Ieruselema.

Sa fa'apea le valoaga a Sakaria i le malaga lenei, **“Fa’auta, o le a alu atu lou tupu ia te oe, o lo’o tietie i le asini, o le tamai asini foi”** Ua taunu’u lea valoaga i lea lava aso. Fai mai le tala tamaiti, sa matua tumu le ala e o’o i Ierusalem, i tagata e to’atele ua o’o atu i le tausamiga. Sa i ai fa’atasi i le motu o tagata e to’atele nisi mai Kalilaia, o e sa matamata i vavega sa faia e Iesu, ua tupu tele ai lo latou naunau ia Iesu, aemaise foi o ona so’o. Ua fa’aalia lea i lo latou fofola o latou ofu i le ala, ua sala e isi lala o la’au ma folasia ai le ala, ua lialia’i lau o pama ma alalaga, **“Osana i le Alo o Tavita, ia manuia le afio mai i le suafa o le Alii, osana i mea aupito i luga.”** (Mataio – 21: 9e). **“Ia manuia le tupu o lo’o maliu mai i le suafa o le Alii, o le manuia i le lagi, o le vi’iga foi i mea aupitoaluga.”** (Luka – 19: 38).

FESOASOANI MO LE FAIAOGA:

1. le tala masani e le suia lava, peita’i, e tatau ma onomea pea le a’oa’oina o fanau i le malaga lea. Ta’atia lava le fa’auigaina loloto o le tala, ae taumafai pea e fa’amatala ma fa’atino i le mea o lo’o tusia ai le tala ma ona upu i le Tusi Paia.
2. E i ai fanau na fa’alogo muamua i le tala lea, sa latou fa’atinoina foi e pei ona masani ai Aoga Aso Sa uma i lenei aso. Peita’i, o le fa’amoemoe lava ia a’oa’oina pea ia matutua ma iloa lelei, a’o aga’i atu i luga i le fa’auigaina.
3. Ou te taofi, o le Aso Sa lenei e mafuli ai vasega uma i le a’oa’oina o le tala lenei i le malaga a Iesu i Ierusalem, e tele lava foi ina fa’amamafa le fa’atinoga ma le alalaga ina ia taofi mau e fanau, aemaise o le fa’amamaluina pea e a tatou ‘aulotu e ala i Aoga Aso Sa le fa’atauaina o lenei Aso Sa taua.
4. Fautuaina ia fa’aauuina le faiga lelei ma le matagofie lena, ma talafeagai lelei mo nai fanau

GALUEGA FA’ATINO – FAITAUGA TUSI PAIA MA FA’AMLAMALAMA UPU.

1. A’o le’i o’o ina fa’atino fa’atasi le malaga fa’atupu a le Alii e le Aoga Aso Sa atoa, e fautuaina pea le faitau Tusi Paia ia atina’e pea la latou faitau.
2. Le fa’atinoga o le nei Aso Sa i lau vasega, fa’amolemole ia maitauina ni upu i le tusi faitau ina ia fa’amalamalama fa’afaigofie i tamaiti o latou uiga, fa’aaoga uiga ta’atele i lo tatou olaga.
3. le ala lena o le lua o tusi faitau, e mo le faitauga Tusi Paia a le fanau, a’o le mataupu o le tusi a Mataio. E amata ai foi le fa’alogo, e i ai foi le malaga fa’atupu a Iesu i isi evagalia. Pe a o’o ina matutua.
4. Sauni loa mo le fa’atinoga tu’ufa’atasi a le Aoga Aso Sa.

A’OA’OGA:

Ua lafo atu lava le vaega lea ia outou Susuga ina ia talafeagai lelei ai a outou tapenaga ma se a’oa’oga taua e te manatu e tu’uina i le fanau, e lelei atu lea ina ia le felefele ai se a’oa’oga e faigofie ona e momoli mo tamaiti.

PESE – Ia pepese leotetele i le taimi o le fa’atinoga o le malaga i pese e iloa uma e le fanau fa’amolemole. **“Osana pepese tamaiti uma.....”**

MANUIA TELE LE ASO SA LAUPAMA, ALOFA ATU MO OUTOU UMA.



APERILA 09, 2023. “ASO SA ESETA”

MATAUPU – “O LE FA’AALIGA O IESU IA MARIA LE MAKATALA.”

TUSI FAITAU – IOANE - 20: 1 - 18

SINI – Ia a’oa’oina pea tamaiti i le tala o le toetu ma le ulua’i fa’aaliga na iloa e le tina o Maria le Makatala, ua toe soifua le Alii.

FA’AALIGA TAUA:

Fa’amolemole atu faiaoga, a’o le’i amataina le lesona o lenei taeao, e lelei ona e taumafai e fai sina fa’amatalaga i le mea na tupu i le Aso Faraile (Aso Maliu), ina ia sosolo lelei ai le tala o le Aso Sa Laupama, ma le Aso Sa lenei. Ina ia amata ona fa’alogo tamaiti ma iloa e le’i tupu le toetu e aunoa ma le oti. Na o sina tala pu’upu’u faigofie lava e fa’amautinoa i fanau na maliu moni lava Iesu ma tanumia i le tu’ugamau, ona soso’o loa lea ma le tala fiafia o le eseta ma le toetu I lenei Aso Sa. E soso atu ai lava e fa’amanatu atu mo lau tapenaga i le vaiaso.

FESOASOANI MO LE MATAUPU:

O le taeao ese lenei i le talitonuga o le ‘au fa’atuatua i le Atua e aofia ai ma tatou. Aua o le fatu lea o le Talalelei ua afua ai ona tatou fa’atuatau ma talitonu i le fa’aolataga mai le Atua, ma tatou tapua’i ai i le Atua soifua pea e fa’avavau, ina ua toetu a’e mai le oti ma le tu’ugamau. O le tala masani a loane e le suia, ae o le fa’amoemoe ia fa’amasani pea le fa’alogo a le fanau i lenei tala taua o lo tatou fa’aolaina.

E i ai le manatu o le a taumafai atu i lenei Aso Sa i si fa’ama’ite lea mo le mataupu, aua e talitonu lava le taofi, ua e faitau pea i le tala lea ma ua e iloa foi lona ta’atiaga mai. Ua manatu ai, ina ia fa’aaoga le faitauina o le Tusi Paia ma fa’atino loa e le fanau ina ia malamalama ai. Ia faitau ma toe faitau le tala, ona fa’atalatalanoa teisi lea mo se lima minute, i lea fuaiupu ma lea fuaiupu. Ia taumafai ia fa’amasani tamaiti i le soso’oga o le tala i fuaiupu ta’itasi, e afua mai le amataga, se’ia o’o ina fa’aali Iesu ia Maria le Makatala. Ia maitau gaoioiga ma talanoaga a tagata o le tala, ona taumafai lava lea e fa’ata’ita’i le faiga lena. O le manatu, afai e masani tamaiti i talanoaga ma gaoioiga a tagata o lo’o i ai i le tala, e sili atu lena nai lo le taumafai e fa’amatala le tala, ae fa’alogologo tamaiti, e tuai ona malamalama le fanau. A’o le fa’amamafa faigofie o lo’o fia tuliloa mo le fanau i le tala lea, ia amata ona a’oa’o tamaiti, o le fa’amaoniga o le toetu na muamua fa’ aalia i tina.

GALUEGA FA’ATINO:

1. Ua tu’uina atu i luga i le fesososani mo le mataupu le fa’atinoga o lo taumafai e momoli atu i lenei Aso Sa.
2. Ae fesoasoani atu fa’amolemole e fa’alautele le fa’atinoga lea.
3. Ia faitau muamua le Tusi Paia i se faitauga auaua’i, ia tofu le tamaitiiti ma le fuaiupu, ae fa’asa’osa’o e lau Susuga le ta’uga ma le fa’aleoga sa’o o upu ma fa’ailoga.
4. Afai e faigata le muamua, ona toe taumafai foi lea o le fa’asologa lena lava e tasi, onosa’i aua e te vave ita ma lelava fa’amolemole. E le leaga foi pe a fa’atele aua e laiititi le tusi faitau, ae o lo’o i ai atoa le atoga o le tala lea.

5. A ma'ea le vaega lea, ona taumafai loa lea e amata ona tofi tamaiti, e faitauina le talanoaga o le tala. Ia tofi se e fa'amatala, ona vaevae loa lea o tamaiti i igoa o tagata o le tala ma faitau loa a latou tala o lo'o i ai i le Tusi Paia. Ia manatua o lena ua talanoa tagata o le tala, ia ave tala a tina i tama'ita'i, a'o tama i alii, e fa'apena foi i tala a Iesu.
6. A ma'ea loa, ona taumafai loa lea e tutula'i i luga ma fa'atino loa va'aiga o lea taeao o lo'o ta'ua i le tusi faitau, e le afaina pea fa'atino pea i a latou Tusi Paia e faitau.
7. Ou te manatu ua fesoasoani se taumafaiga mo a outou Susuga i le mataupu o lenei toetu.
8. Manuia le alo atu mo le lesona ma lona fa'atinoga, ia ta'ita'iina e le Agaga Paia le galuega mo lona vi'iga.

A'OA'OGA:

E faigofie se manatu pe a ou fa'apea atu, o le a'oa'oga lelei mo le fanau i lenei Eseta, ia amata ona talatala lemu o latou mafaufau ma le fa'alogo i tala o le Tusi Paia, ma totoina i o latou mafaufau ma loto, e moni lava le tala i le toetu o Iesu, e le o se tala pepelo pe fatu foi e se tagata. Aemaise na muamua fa'aali Iesu i le tina.

PESE – Afai na e saunia se pese mo le fanau, ua lelei tele lea fa'afetai le tapena. Ae afai e leai, ou te matua fautuaina le tatou tusi pese, # 51 e maua uma e le fanau.

Manuia le Aso Sa o le Eseta, malo le galulue.



ASO SA - APERILA 16, 2023

MATAUPU – “UA FA'AALI IESU I LE TO'ASEFULU, E LE O I AI TOMA.”

TUSI FAITAU – LUKA – 24: 36 - 43

SINI – Ia amata a'oa'oina le fa'alogo ma le maitau a le fanau i nisi o mea na tutupu ina ua toetu Iesu

FESOASOANI MO LE MATAUPU:

E pei lava ona soso atu, e leai se manatu e fa'aloloto le fa'amatalaina o tala ia i le fanau. Ae o le fa'amoemoe taua ia amata ona talatala le latou fa'alogo ma le maitau i le gasologa o mea na tutupu i le ma'ea o le toetu o Iesu. E ui e le mafai ona maua atu lona atoatoa, ae ua manatu e 'oto'oto na o ni nai tala.

Fai mai le tala a Luka, o lo'o talatalanoa i latou i le tele o mea na tutupu ia Iesu, e le gata o lona mailu ma lona tanuga, a'o lea foi ua sau le tala ua toetu o Ia. Ua toe ola mai Iesu sa oti tamaiti, ua leai se Iesu i le tu'ugamau. A'o fai Ia le talanoaga lea, ma le le mautonu, ae tete'i i le maliu ane (savali ane) o Iesu ma tu i totonu i le mea o lo'o latou talanoa ai. Ua fefefe ma atuatuvaile i latou, ma atili ai ona le mautonu o latou mafaufau i nei mea, ua latou manatu o se agaga o Ia. Ae ua fa'ate'ia i latou i le fetalai ane o Iesu ia te i latou, Se a le mea ua ouotu atuatuvaile ai, aisea foi e tutupu ai le masalosalo i o outou loto? Ua ia fetalai atu foi, ia outou va'ava'ai mai ia te a'u, o a'u lava lenei, omai e tagotago ma fetagofi i o'u vae ma o'u lima, o a'u lava lenei. E le o a'u o

se agaga, aua e leai ni ivi po’o ni a’ano o se agaga, pei o a’u nei ua outou va’ava’ai mai i ai. Na fetalai lea o Iesu ina ia fa’amaonia atili o ia lava o Iesu ua toetu, e i ai ea ni a outou mea’ai? Ona latou avane lea o sina fasi i’a ia te la, ua taumafa foi o ia i o latou luma, ina ia fa’amaonia atili lava, o ia lava o Iesu na maliu ua toetu.

FESOASOANI MO LE FAIAOGA:

1. Ia faitau lava le Tusi Paia mo le fa’alelei o le vaega lea o lo latou ola a’oa’oina.
2. Fa’amalamalama ni upu po’o ni fa’aupuga e le malamalama i ai tamaiti i le gagana faigofie, ona amata loa lea ona fa’amatala le tala i le fesoasoani ua tu’uina atu.
3. E pei lava ona soso atu fa’amoemoele, o le fesoasoani e mo a outou Susuga i faiaoga, ae fa’aaogaina lava le gagana e faigofie o aso uma, ina ia maua ai e tamaiti le uiga o le tala po’o le mataupu.
4. Aua le taofia nisi auala po’o ni metotia e tapena ai lau Susuga mo le mataupu, a ia mautinoa lava o lo’o fua i le matutua o nai fanau.
5. le ala lava lea e fautuaina ai lava lau tapenaga o le vaiaso a’o lumana’i le Aso Sa o vaiaso uma ina ia faigofie ma mama ai la tatou galuega mo le fanau, ma viia ai le Alii.

GALUEGA FA’ATINO – MATEGA TUPUA

Ia ta’oto le tupua lea o le a fa’ai’u i ai la outou aoga o le Aso Sa lenei, e lelei ona saunia e lau Susuga sina tama’i fa’ailoga mo le tamitiiti o le a mauaina le tali o le tupua. Ia manatua o le tali o le tupua, o le mataupu lena o le Aso Sa o lumana’i. A le mate’ia e tamaiti le tupua, ona ta’u lea i ai o le tali, ae pule lau Susuga i le fa’ailoga.

TUPUA – Mate mai pe to’afia so’o ia na tatou talanoa i ai i le aso, na fa’aali muamua i ai Iesu? Mate mai le so’o e le’i i ai i le taimi lea? **Tali – E to’asefulu so’o, o Toma le so’o e le’i i ai i le taimi lea.**

O le tatou tala lena i le vaisaso fou.

A’OA’OGA:

Afai e fua i upu o le talanoaga a Iesu ma le to’asefulu i lenei taeao, e lelei ona amata fa’amamafa i tamaiti le talitonu fa’amaoni i le toetu o Iesu i taimi uma latou te fa’alogo ai i le tala lena, aua le masalosalo.

PESE – Pe afai e mafai ona a’oa’o se fuaiupu se tasi o le pese #224 o le tatou tusi pese o le matua selau pasena le aoga o lenei aso

Fa’afetai le onosa’i, malo le alolofa i fanau.

////////////////////////////////////

ASO SA - APERILA 23, 2023

MATAUPU – “UA FA’AALI IESU I LE TO’ASEFULU MA LE TO’ATASI, UA I AI MA TOMA”

TUSI FAITAU – IOANE – 20: 24 - 29

SINI – Ia a’oa’oina tamaiti i le taua o le talitonu ia Iesu ma fa’atuatua i ai, ae tia’i le masalosalo.

TAULOTO – IOANE – 20: 29 *“Ua fetalai atu lesu ia te ia, Toma e, ua e fa’atuatua aua ua e va’ai mai la te a’u, amuia o e le vaai mai, ae fa’atuatua mai pea.”*

FESOASOANI MO LE MATAUPU:

O le tala malamalama ma silafia e a outou Susuga, ae fautuaina pea le fa’amatala ma fa’amalamalama i le fa’asologa a le tusi faitau e faigofie ma maua gofie e tamaiti.

O le tali o le tupua i le Aso Sa ua tuana’i, o le tagata lena o le a autu i ai le talanoaga i le Aso Sa lenei. O lo’o manino le molimau a loane, sa le’i i ai Toma i le fa’aaliga muamua i le afeafe aupito aluga. Na fa’amatala lea e nisi o le ‘au so’o ia Toma, le fa’aali atu o lesu i le to’asefulu ma mea na fetalai ane ai lesu ma le taumafa i le fasi i’a na latou avane ia te ia. Peita’i, e le’i talitoinu Toma i le latou tala. Ua fa’apea le tala a Toma, **“afai ou te le va’ai atu i ona lima, i mea na tutu’i ai fao, ma tu’u lo’u tamatama’ilima i mea na tutu’i ai fao, ma tu’u lo’u lima i lona itu, ou te le talitonu lava.”** Ua mavae aso e tolu o le talanoaga lea, ona toe fa’atasi foi lea o le ‘au so’o i le fale, ua i ai fa’atasi ma Toma. Ua toe maliu ane foi lesu ma tu i o latou luma ma ua fetalai atu, la outou manuia” Ona fetalai atu lea o lesu ia Toma, **Aumai ia lou tamatama’ilima i’inei, va’ai mai foi i o’u lima, aumai ia foi lou lima, ma tu’u mai i lo’u itu, aua foi e te masalo vale, a ia e fa’atuatua.** Ona tali mai lea o Toma ia lesu, **Lou Alii e, ma lou Atua e,** Ona fetalai atu lea o lesu, **Toma e, ua e fa’atuatua, aua ua e va’ai mai ia te ‘au, amuia o e le va’ai mai, ae fa’atuatua mai pea.”** Ta’u i tamaiti o Toma o le isi ona igoa o Titumo.

FESOASOANI MO LE FAIAOGA:

1. E lelei ona e amata i le mataupu o le Aso Sa ua mavae, e toe fa’amanatu ma fesilisili i ai i le fanau, e tau tata’i malie mai ai o latou lagona aemaise lava o le fa’alogo i le soso’oga o le tala lea, i le fa’aali o lesu i ona so’o ina ua toetu o ia. Manatua, e muamua lava le faitauga o le Tusi Paia ia mautu, fa’atonutonu ma fa’asa’osa’o le fa’aleoga ma le ta’uga o upu, ma fa’aaoga fa’ailoga.
2. Amata loa le mataupu o le Aso Sa lenei, fa’amatala lava i le fa’asologa o lo’o i ai i le tusi faitau, e pei ona faitauina e le fanau, e taofi lava o le a faigofie ona mulimuli atu ai i latou .
3. Ia fa’amatala lava ma fesilisili i ai, ma tali ane foi i latou ina ia le ‘iva ai le mataupu. Taumafai e fa’aola ma fa’afiafia tamaiti i ni au taga ma lou siufofoga e fa’amatala ai le tusi faitau.
4. Iau tapenaga lava o le vaiaso e te tua i ai ina ia saunia ai foi le fanau e fa’alogologo ma le manino i le lesona.

GALUEGA FA’ATINO:

1. E na o se fesoasoani atu mo lau Susuga i lea vaega, ae pule lava lau Susuga i sau tapenaga e te silafiaina e sili atu ona lelei mo fanau. O le fa’amoemoe lava o lenei vaega ia tele ni auala ma fa’atinoga e vave ai le maitau a fanau.
2. E le taofia fesili aua o le faiga masani lava lea e le mafai ona ‘alofia i a’oa’oga, e fa’alautele ai le mataupu, a’o le fa’atinoga po’o le a lava le faiga, e fesoasoani tele e fa’amanatu ma fa’amautu i mafaufau ma le fa’alogo a tamaiti le galuega o lo’o outou gapatia ai.

3. Ia mautinoa lava ia vave le fa'alogo ma le maitau a tamaiti i igoa o lo'o i ai i lea tala ma lea tala. O le auala e fa'atino ai, o le fai lea ma tusi i a latou api ae fa'asa'osa'o e lau Susuga. Manatua foi, o le tautala ma tusi ma fa'atino, o le auala vave lea i le mafaufau o le tamaitiiti.
4. Fa'aaoga nisi fa'atinoga fa'amolemole e faigofie mo le fanau, pe afai e maua ni mea faitino e fa'atino ai.

A'OA'OGA:

E feso'ota'i le lesona o le aso ma le vaiaso ua tuana'i. O le le talitonu ma le masalosalo, o se a'oa'oga taua mo le tama ma le teine Aoga Aso Sa ma to'aga i le lotu. Ua fa'aopoopo e Iesu ia Toma le mataupu o le Aso Sa lenei, i le fa'atuatua i le Atua, tusa lava pe le va'ai i ai.

PESE – Afai na tapena sau pese ua lelei tele lava, ae afai e leai, toe fa'amanatu le fuaiupu o le pese sa a'o i le vaiaso ua te'a, afai ua maua, a'o loa se isi fuaiupu o le pese manaia lena #224.

Fa'afetai le onosa'i, malo le fa'amalolosi
 //////////////////////////////////////

ASO SA - APERILA 30, 2023

MATAUPU – MATAUPU FA'AMANATU

SINI – Ia toe fa'amanatu ma fa'amautu lesona po'o mataupu sa outou gapatia ai ma le fanau, ia mautinoa ua taofi i nisi mea taua o le a'oa'oina.

FA'ATINOGA O LE MATAUPU: TALI I FESILI MA TOE FA'AMANATU MA FA'AMALAMALAMA.

1. I le Aso Sa o le laupama, e fia asini o lo'o taua e le tusi o Mataio na tatou talanoa i ai?
Tali – E lua, o le asini ma lana tama
2. Ie a le fa'atonuga a Iesu i ona so'o na o e aumai le asini? **Tali** - A fai ane se tasi pe ua tatala e a le asini, ona fai lea i ai , **e manao ai le Alii.**
3. Ie a le valoaga a Sakaria e uiga i le malaga a Iesu i Ierusalaema? **Tali – Fa'auta o le a alu atu lou tupu ia te oe, o lo'o tietie i le asini, o le tama'i asini foi.**
4. Ie a le alalaga a tagata ia Iesu i le ala? **Tali – Ioane – Osana i le Alo o Tavita, ia manuia le afio mai i le suafa o le Alii, osana i mea aupito i luga. Luka – Ia manuia le tupu o lo'o maliu mai i le suafa o le Alii, o le manuia i le lagi, o le vi'iga foi i mea aupito aluga**
5. Ia tu'u atu le avanoa i tamaiti e tali ane ai lava le tamaitiiti latou i le tala na outou talanoaina o le Aso Sa o le Eseta. Fa'amolemole faiaoga ia toe fa'amatala fa'atelevave teisi le tala ina ia tau pu'e le manatua o nai tamaiti, ona tusi ane lea o a latou tali, pe tali gutu ane foi. Fa'amolemole, e leai se tali e sese o a latou tali, ia fa'ataua uma ma fa'afetai i ai i lo latou fiafia e a'o'oga. Vagana ua matuia le sese, ona fesoasoani fa'alau'itele loa lea ia i latou uma. Pe tasi, lua ni nai manatu i le tala e maua ane pe sili atu foi, ua e mautinoa o lo'o aoga lau tapenaga i vaiaso uma. Malo le tapena.
6. Ie lesona po'o le mataupu i le Aso Sa 16, 2023, e lelei ona ona toe tapena le fanau i le vaega o le tala o lo'o i le tusi faitau, ona vaevae loa lea i vaega e lua, taumafai e fa'atino

ma tautatala i upu o le talanoaga a Iesu ma ona so’o. Ia mulimuli pea i le fa’asologa o lo’o i ai i le tusi faitau. (Luka – 24: 36 – 43) Ia i ai se fa’amatala fa’amolemole.

7. le vaega lona lua, e fa’atinoina le talanoaga lava lea a Iesu ma ona so’o a ua i ai ma Toma. Ia fa’asolo lava foi i upu ma tala e pei ona i ai i le tusi faitau. E le fa’asaina le fa’aaoga o le Tusi Paia e talanoa ai, o le mea lava ia e maitauina o lo’o mafai ona amata iloa e tamaiti le feso’ota’iga o mataupu ma upu o lo’o i ai. (Ioane – 20; 24 – 29) E lelei pea ae tofi se tamaiti e fa’amatala i vaega uma e lua, ina ia sosolo lelei ai le talanoaga ma maua e tamaiti. O ia lea e fa’amatalaina le tala – fa’ata’ita’iga – O upu e le o ni fetalaiga a Iesu po’o upu a isi tagata e pei ona i ai i le talanoaga.

A’OA’OGA -

Toe fesilisili lava i le fanau i ni a’oa’oga ua latou maua mai lesona sa outou a’oa’oina ma fa’alogo i ai i le nei masina.

PESE - Afai e lava le taimi, ona saunia lea o ni nai pesepesega e tualuga ai galuega o le nei masina, ma fa’ai’u loa i sau fa’amalosi ‘au mo i latou ina ia fa’amalolosi atu pea i le aoga, ma se tatalo fa’ai’u fa’amolemole.

Malo le galulue, fa’afetai tele le lagolago mai, fa’amanuia atu le Atua

////////////////////////////////////

ASO SA - ME 07, 2023

MATAUPU – “O LE TINA LOTO FESOASOANI MA LE ALOFA”

TUSI FAITAU – IOSUA – 2: 1 – 7.

SINI – Ia fa’amasani le a’oa’oina o tamaiti i le lelei ma le manuia e maua pe a loto fesoasoani ma alofa i isi tagata.

FESOASOANI MO LE MATAUPU:

O Ra’ava e nofo i Ieriko, ma sa manatu tagata o le fafine o Ra’ava o se fafine leaga, ona e va’ai tagata e amio le lelei Ra’ava i nisi o taimi. E manatu tagata, e agasala ma amio leaga. Peita’i, i le tala lea, e ui ina iloa Ra’ava o se fafine leaga, ae na ia faia se galuega alofa ma le fesoasoani ia Iosua ma Isaraelu i le fa’asaoina o e na ‘auina e asiasi i Ieriko.

E talitonu foi, sa i ai le Atua ia Ra’ava ma ana fuafuaga aua le fa’ataunu’uina o lana folafolaga mo le nu’u folafolaina o Isaraelu. Fai mai le tala, ina ua oti Mose sa ia ta’ita’ia le nu’u o le Atua (Isaraelu), ona soso’o ane lea ma Iosua. Ua ta’ita’i Iosua i le nu’u, a’o lumana’i le sauni atu o Isaraelu e sopoia le vaiata o Ioritana, ma o atu ai i le nu’u na folafolaina e le Atua e fai ma o latou nu’u. Ina ua latalata atu i Ieriko, na fa’atali le nu’u ae tutuli e Iosua nisi e to’alua o Isaraelu e o e asiasi i le nu’u o Ieriko. O nei tagata na o fa’alilolilo i le po ina ne’i iloa e tagata o le nu’u o

Ieriko ona faigata lea ona fuafua le o atu o Isaraelu. Na o e va'ava'ai itu uma o le nu'u o Ieriko ina ia faigofie ona fasi e Isaraelu.

Na o atu nei le to'alua lea ua o i le fafine Ieriko, e igoa ia Ra'ava. O i'ina sa la nonofo ai, ma i'u ina iloa ai e nisi o le nu'u, ma latou o atu ai loa ua ta'u i le tupu o Ieriko. Ua logotala i ai le tupu ma ua feau ia Ra'ava ina ia aumai i ona luma tagata ia. E taunu'u atu le feau ua uma ona fa'alafi e Ra'ava le vaega lea. Na tali Ra'ava i le feau a le tupu. E sa'o na o mai tagata e to'alua i lo'u fale, ae ou te le iloa le mea e o mai ai laua. Ou te le iloa foi le mea o aga'i atu i ai. Ae sili ai ona outou o atu e tuliloa. Na fa'apea loa ona alu atu le tuliloaga. Na alu atu le tuliloaga, ae sau Ra'ava ua tu'utu'u ifo i lalo le vaega lea sa ia fa'alafi i le fa'amalama, ma fai atu i ai, la te o loa, ma toe foi atu.

Tamaiti, ua fa'afetai tagata nei ia Ra'ava, ona o lana fesoasoani ia i laua ina ne'i maua e tagata Ieriko ma fasia i laua, a'o le alofa ma le agalelei o Ra'ava na ia fa'alafi ai ma fa'asaoina ai o laua ola. O le tui la o le alofa o Ra'ava, na fai i ai tagata nei ia Ra'ava, o le a fa'asaoina o ia ma lona aiga pe a fasia uma Ieriko e 'au a Isaraelu. O ia mea uma na ia faia i lona loto fesoasoani, e le taumate sa iai foi le Atua i fuafuaga a Ra'ava.

Tamaiti, sa loto fesoasoani le tina o Ra'ava, sa alofa ma agalelei i tagata o lo'o fia maua se mapusaga. Ou te taofi foi o lo'o fa'apena o tatou tina a ea? O ai e agalelei lona Tina? O ai e agaalofo lona Tina? O ai e loto fesoasoani lona Tina? Ia matua lelei tele. Tamaiti o le Aso Sa a sau o le Aso Sa o Tina, ioe, tapena lelei sau meaalofa i lou tina ua e iloa? Ae sili ai ia e loto alofa ma agalelei i isi tagata pei o lou tina, a ea?

Tamaiti, ia tatou loto fesoasoani i tagata ua mafatia, alofa iai, ma galelei iai. O uiga na o lo'o finagalo iai le Atua.

FESOASOANI MO LE MATAUPU:

1. Faitau le Tusi Paia ia so'o uma tamaiti ma ia fa'amalamalama upu e le iloa e le fanau. Fa'asa'osa'o le ta'uga o upu ma le fa'aleoina.
2. Fa'amatala le tala i le fesoasoani ua tu'uina atu ma lau tapenaga o le vaiaso mai le tusi faitau, ina ia faigofie ona malamalama ma maua e tamaiti le uiga o le tala.
3. Ia a'oa'o le fa'atinoga o le fesili ma tali, aua le avea uma e lau Susuga le taimi, e 'iva ai le fanau.
4. E tatau lava ona fa'atalanoa ni nai fesili faigofie e fa'amautu ai le mataupu fa'amolemole.
5. Aua le taofia nisi metotia a lau Susuga e faigofie i le fanau ona mulimuli atu ai i lau mataupu, ma malamalama ai i latou ma taofi mau ai.

GALUEGA FA'ATINO:

Ia fa'atino e lau Susuga ma nisi tamaiti o le vasega le tala aua e faigofie lava.

1. Ia fa'atino le o fa'alilolilo o tagata to'alua i Ieriko
2. Ua taunu'u i le fale o Ra'ava, ma ua iloa e tagata o le nu'u.
3. Ua o tagata ta'u i le tupu o Ieriko, ma le feau a le tupu ia Ra'ava e avane tagata i ona luma.
4. Ie galuega na fai e Ra'ava i tagata e to'alua, ma lana tali i tagata na 'auina ane e le tupu.
5. Ua fa'asosola e Ra'ava i laua ma le folafolaga na fai e tagata ia Ra'ava.

E leai se afaina pe a fa'aaoga pea le Tusi Paia e fa'atino ai a outou fa'atinoga aua o lena ua uma ona faitau i ai le fanau, e faigofie ai ona o le taimi. Fa'agata ai iina, ua manino ai le tala sa outou feagai ai.

A'OA'OGA: E tauia e le Atua le tagata loto fesoasoani i e mafatia. Ia e agalelei i tagta aua e alofaina ai oe e le Atua ma tagata. Fa'aopoopo ane nisi a'oa'oga se tele fa'amolemole pe a lava le taimi.

PESE: Saili ane se pese e pepese fiafia ai tamaiti ona fa'ai'u loa lea i se tatalo. Fa'amanatu i tamaiti aua ne'i galo ona vave atu i le Aso Sa o lumana'i, e fa'amanatu ma fa'ataua le Aso Sa o Tina.

Manuia galuega o lenei Aso Sa, Manuia le alo atu i le Aso Sa o Tina.
////////////////////////////////////

ASO SA - ME 14, 2023. "ASO SA O TINA"

MATAUPU – "O LE FAFINE MATIVA MA LANA TAULAGA I TOE TUPE"

TUSI FAITAU – MAREKO – 12: 41 - 44

SINI – la a'oa'oina ma fa'amasani le fa'alogi i le a'oa'oga a Iesu e uiga i le foa'i o mea uma e pei o le fafine mativa ma lana taulaga..

FA'AMANUIAGA O LE ASO SA O TINA

E fa'aaogaina lenei avanoa e momoli atu ai fa'amanuiaga ma alofa'aga i le tina o le galuega ma tina uma o lo'o gapatia i le faiva o le a'oa'oina o fanau i totonu o aulotu ma nu'u taitasi, ae maise tina o lo'o gafa ma le tausiana o fanau. Malo le galulue, fa'afetai le faitama. O lo outou alofa i fanau ua outou le fa'alologotiga ai i le galuega. Fa'afetai, Fa'afetai, fa'afetai tele lava.. la maua lo outou malosia aua le Atua ma lana galuega.

Ia manuia tele le Aso Sa fa'ailogaina mo outou tina uma lava. Alofa'aga ma fa'amanuiaga mai le Fa'atonu ma lo tatou Ofisa o Aoga Aso Sa ma Autalavou.

TAULOTO – MAREKO 12: 43. "Ona vala'au atu lea o ia i ona so'o, ua fetalai atu ia te i latou, E moni, ou te fai atu ia te outou, o mea a lena fafine mativa, ua oti lana tane, ua lafo i le mea e teu ai tupe, ua sili ia i a latou uma na lafo i ai.

FESOASOANI MO LE MATAUPU:

O le tala o lenei taeao tamaiti, e le se tala umi. Ae fa'alogi lelei i le a'oa'oga na ta'u e Iesu i tagata e to'atele o i latou na lafo a latou tupe i le mea e teu ai tupe. Tamaiti, o le to'atele o i latou ia o tagata mauoa, fai mai a'o nofonofo Iesu e fa'afesaga'i ma le mea e teu ai tupe, na gasolo ane le to'atele o tagata ma lafo a latou tupe i le mea e teu ai tupe. Na iloa lelei e Iesu le 'au mauoa ua tele a latou tupe na lafo, a'o va'ava'ai ane i ai Iesu. Sa i ai la ma le fafine po'o le tina mativa tamaiti i le nofoaga lea, fai mai ua te'i Iesu i le va'ai atu ua alu ane le fafine mativa ma lafo ana tupe iti e lua i le mea e teu ai tupe. Talofa e, e le iloa pe na a'amua ane i ai le 'au mauoa a tamaiti, aua e fai o le mativa, ae na o le lua ana tupe iti. Tamaiti, o ana tupe iti e lua, e ta'u lea o le **Kotane, (o le uiga o le upu kotane, o le tupe apa laitiiti,)** a fa'aliliu i tupe ua i ai

nei, **e tasi le kotane e tutusa lea ma le afa sene. (1 kotane = afa sene).** Peita’i tamaiti, na silafia lelei e Iesu le loto o le tina na ala ai ona lafo ana tupe e lua sa ia te ia. O le fafine mativa toe pau a ia o ana tupe, ua ia le manatu ai e taofi, ae foa’i uma lava. Fai mai le a’oa’oga a Iesu tamaiti i tagata mauoa ma Tusiupu ma Faresaio. O le foa’i a le fafine po’o le tina mativa i le mea e teu ai tupe, ua sili mamao lena i lo tupe na foa’i e i latou o e mauoa. Aisra? Fai mai Iesu, aua o le fafine ua foa’i uma lava ana tupe, e leai se mea na ia taofia. A’o tagata mauoa ma le to’atele o i latou na lafo a latou tupe i le mea e teu ai tupe, ua latou lafo isi tupe, ae taofi isi tupe ma latou. O le ata o le tina faitaulaga lelei mo le Atua, e ave uma e le ‘aiu pe lima mau. E le fa’amoemoe i se tau, e le va’ava’ai foi i se tau, ae fa’atuatua e tau mai lava le Atua.

GALUEGA FA’ATINO:

1. E talu ai o le Aso Sa o tina, e i ai le taofi o lo’o tapena foi le fanau mo lo latou sao i le fa’atauaina o tina i ‘aulotu uma.
2. E lelei ai ona amata le vasega i se talanoaga fa’asamasamanoa ma nai tamaiti, e uiga i lenei Aso Sa. Fesili i ai pe aisea e fa’ataua ai tina i lenei aso e tasi o le tausaga. Fesili pe ua i ai ni a latou meaalofa mo o latou tina. O ai la e fa’alogata i lona tina, ae pe leaga pe lelei lona tina, ma isi tala malie o le a gagana ai le fanau e amata ai le mataupu.
3. Faitau le Tusi Paia ma maitau po’o aga’i i luma le faitau Tusi Paia pe aga’i i tua, ona fetu’una’i lea o le auala e faitau ai, onosa’i aua le fai mea ita, ae alofa i tamaiti, o fanau a oe ma a’u
4. Fa’amatala le tala i se fa’atalatalanoaga faigofie, amata i se fuaiupu po’o se upu, ae fa’auma e le fanau, e ola ma taofi gofie le auala lena.
5. Ia tuli mata’i e le mataupu le a’oa’oga na fai e le tina, o le ofo uma o mea sa totoe ia te ia, e ui ina laiititi. E le o le aofa’i, a’o le agaga e fai ai, na vi’ia ai e Iesu.
6. Aua le taofia lau tapenaga i le fesoasoani ua tu’uina atu, ae tapena pea oe ina ia fiafia tamaiti e fa’alogologo i lau tapenaga.

A’OA’OGA: E pei ona soso atu, ua ta’oto atu lava le vaega lea o le mataupu i lau Susuga e talafeagai lelei ma lau tapenaga o le vaiaso. A’o le Aso Sa o tina ma se fe’au mo tamaiti, ia alolofa fa’amaoni i o latou tina, aua e ui lava ina matitiva, e foa’i lava mea sili ma mea lelei mo i latou le fanau. E le lelei se moe a le tina ona o fanau, o tina foi, e le ma le mativa ona o fanau. Ia lagona le loto fa’afetai i le Atua ona o tausiga a matua, aermaise lava o tina. A’oa’o tamaiti ia amata i le Aso Sa lenei ma aso uma pe afai e le o faia, ona iloa fa’afeta’i i o latou tina, ma fai i ai I love you mom.

PESE – Ia tapena fa’amolemole se pese mo tina e usu e le fanau ma fa’amanuia loa le Aso Sa o tina. A maua ni tou ‘ula, aumai sa ta ‘ula fa’amolemole.

MANUIA OUTOU TINA, MANUIA LE SAUNIGA O LE ASO SA, ALOFA ATU.



ASO SA - ME 21, 2023

MATAUPU – “UA AFIO A’E IESU I LE LAGI”

TUSI FAITAU – GALUEGA – 1: 1 - 11

SINI – Ia amata ona a’oa’oina tamaiti ina ia fa’alogo ma maitau, e muamua le afio a’e o Iesu, ona o’o ai lea i le Aso o le Penetekoso.

TAULOTO – GALUEGA – 1: 11a

O outou tagata Kalilaia e, se a le mea tou te tutu ai ma va’ava’ai i le lagi? O Iesu lena ua ‘aveina a’e nai ia te outou i le lagi.....

FESOASOANI MO LE MATAUPU:

Ua mavae tiga o le Alii ma ua fa’amaonia lava fa’ailoga e tele o lona toe soifua a’e nai le oti ma le tu’ugamau. E 40 po na iloa ai o ia e i latou, ma na fetalai atu i mea o le malo o le Atua. Sa fa’atasi pea o ia ma i latou, ona fetalai atu ai lea e Iesu se tasi fa’atonuga mo i latou, la le tu’ua e le ‘au so’o Ierusalemama mo le galuega tala’i, a ia fa’atali i le mea na folafolaina e le Tama, ua outou fa’alogo ai ia te a’u. Aua na papatisoina loane i le vai, a’o outou, e papatisoina outou i le Agaga Paia, e le tele ni aso e va ai. (fa’atatau i le 10 aso talu ona afio a’e o ia, ona afio ifo lea o le Agaga Paia). Ua fetalai atu foi Iesu, o le a maua e outou le mana (malosi) pe a afio ifo le Agaga Paia i luga ia te outou, e fai foi outou ma molimau ia te a’u, i Ierusalemama, ma lutaia uma lava ma Samaria, e o’o lava i le tuluiga o le lalolagi. Ua fetalai atu o ia i ona so’o, ona si’itia a’e lea o ia, a’o latou tutu ma va’ava’ai atu i le ao ua avea o ia i o latou luma. Ua latou tutu ma tulimata’i (tilotilo) a’e i le lagi, ae tutu ane tagata e to’alua ua ofu sisina i laua, ma fa’apea ane, O outou tagata Kalilaia e, se a le mea tou te tutu ai ma va’ava’ai i le lagi, o Iesu ua ‘aveina a’e nai ia te outou i le lagi, e fa’apea ona toe afio mai o ia, pei o lona afio atu i le lagi na outou va’ava’ai i ai.

FESOASOANI MO LE FAIAOGA:

1. Ia faitau ia sologa lelei le faitauga Tusi Paia, e pei ona tatou manaomia ia lelei lea vaega o le tatou galuega, e ala i le atagia mai i fanau o lo’o aga’i pea i luma ma lelei le latou faitau.
2. Ia fa’amalamalama ni upu po’o ni fuaiupu e faigata i le fanau ona malamalama ai i le gagana faigofie o aso uma.
3. Fa’amatala e lau Susuga le tala fa’amolemole i se leo fesuisuia’i, ma fa’atino i ni au taga upu o lo’o e fa’amatalaina ai le tala.
4. E pei ona fesoasoani atu, o le fesoasoani ua tu’uina atu e mo lau Susuga ina ia faigofie ona e maua le a’ano o le tala, ona pule lea o oe i le fa’amatalaina, i upu o lo’o ai i le tala.
5. le ola o le mataupu o le fai ma fesili i tamaiti, ia talanoa oe ma tali atu foi tamaiti, aua nei avea umi e oe le tala ae talanoa ma le fanau e ala i le fesili ma tali, e te maua ia le fa’alogo a le fanau.

GALUEGA FA’ATINO –

Ia tu’u le avanoa i tamaiti e tusi ai sana ata e fa’ailoa ai le manatu sa fa’amatalaina, o Iesu na ‘aveina a’e i le lagi a’o tutu ma va’ava’ai a’e i ai le nu’u o Kalilaia. Ia fa’ailoa foi i le ata o ao na ‘aveina a’e Iesu, aemaise o tagata po’o agelu e to’alua na latou fesaga’i. Manatua, e leai se isi e va’ava’ai a’e, ae tusi le ata, o lae e va’a ifo i lalo. O le avanoa tonu foi lea e fa’asa’o ai tama’i upu ia i le fanau, i le fa’aaogaina o le gagana sa’o. O le a’e o luga, a’o le ifo o lalo. Va’ai a’e o le va’ai i luga, a’o le va’ai ifo, o le va’ai i lalo.

A’OA’OGA: E pei ona fa’atonuina e Iesu ona so’o ia fa’atali i le afio ifo o le Agaga Paia e maua ai le malosi, ia fa’apea ona fa’amasani i ai tatou le fanau. O le a le ala e fa’atino ai le fa’atali. To’aga e tatalo ma aioi i le Atua.

PESE – Tele pese o le Agaga Paia i le tatou tusi pese e te filifili ai, ae pule lava lau Susuga pe afai na tapena sau pese i le vaiaso.

Manuia tele leni Aso Sa. Fa’afetai le onosa’i.
////////////////////////////////////

**ASO SA - ME 28, 2023. “ASO SA PENETEKOSO”
MATAUPU – “O LE AGAGA PAIA LE FESOASOANI SILI”**

SINI – Ia a’oa’oina tamaiti ia manatua pea fesili fa’avae o le tusi fesili o le Aoga Samoa, ia le gata e fesoasoani ai i le latou tapenaga, ae ia amata ona i ai so latou malamalama e uiga i le Agaga Paia.

FA’ATINOGA O LE MATAUPU:

1. Ua si’itia mai nisi o fesili o le vasega tolu i le Aoga Samoa, ua manatu e taua lea mo le fanau i leni Aso Sa fa’ailogaina, ia amata ai ona latou tali ma iloa le a’oa’oina o lea fa’avae mo i latou.
2. E fautuaina fa’amolemole, o le fa’atinoga lava lea o le lesona mo leni Aso Sa taua, ina ia ta’ape le fanau ua mafai ona latou tali ane i nisi o fesili.
3. Fa’amolemole ia taumafai pea i le itula e tasi o le aoga, e a’oa’oina ai fesili ma tali mo le fanau. E fai lava ma malolo i nai minute ma toe a’oa’o.
4. E fautuaina lava foi le faitau pea o le Tusi Paia fa’amolemole, i le tala masani o le Penetekoso e pei ona i ai i le Galuega - 2: 1 – 11. E taua pea lea i le manatu ina ia a’o fesili ma tali, ae amata ai foi ona iloa ma fa’alogo ma faitau i le mea na tupu i lea aso.
5. E leai se manatu e fa’amatala le tala, a’o le faitau ia manino ma sa’o le fa’aleoga o upu ma fa’ailoga. Ae afai lava e te saunia i lea mea, aua le taofia le galuega a le Agaga Paia, ua ia faigofie i tamaiti fa’amolemole.

FESILI – MATAUPU SILISILI MO TAMAITI (VAEGA 3, Tusi Fesili)

1. ai le Agaga Paia? **Tali** – O le Peresona lona tolu lea o le Atua Tolu Tasi, le Tama, le Alo, ma le Agaga Paia.
2. le a le Agaga Paia? **Tali** – O le si’ufofoga o le Atua ua lagona i o tatou loto.
3. Pe mafai ona talia le Agaga Paia e tamaiti? **Tali** – Ioe, aua ua folafolaina e le Atua o le a liligi ifo lona Agaga Paia i luga o tagata uma lava.
4. Po’o le a le fetalaiga a Iesu i ona so’o e uiga i le Agaga Paia? **Tali** – E maua e i latou le mana, pe a afio ifo le Agaga Paia, ona mafai ai lea ona molimau ia te ia.
5. Po o le a le mea na tupu i le Aso Penetekoso? **Tali** – Ua fa’aloga le ta’alili, ma latou iloa laulaufaiva afi i o latou luga, ma ua fa’atumuina foi i latou uma i le Agaga Paia, ua tautala ai i gagana ‘ese’ese.

6. Ua manatu ua lava fesili ia mo le aoga i lenei Aso Sa. O le fa'amoemoe o le mataupu, ia ma'ea ane le itula e tasi, ua mafai ona tali tamaiti i nai fesili fa'avae na. Ae fa'amoemoe atu, o le a fa'aauau pea ona fa'amanatu pea i Aso Sa o le aoga. E le faia ia maua uma fesili, a ia i ai lava se fesili e maua e nai tamaiti.
7. E foliga laitiiti si mataupu, a'o le taua ma le aoga i fanau o lo'o ta'oto lea i a outou Susuga i Faiaoga lona fa'atautaiga ina ia fa'ato'aga ona a'oa'o atu.
8. E taua lava foi fa'amolemole ona a'oa'o ma ta'u atu i tamaiti le uiga faigofie o le Penetekoso, e pei ona silafia uma. Penetekoso – o lona uiga o le lima sefulu aso talu ona toetu a'e Iesu ma afio a'e i le lagi. (lona uiga, e 40 aso talu ona toetu le Alii, ona afio a'e lea i le lagi, o le mavae o le 10 aso o lona afio a'e, ona taunuu loa lea i le Penetekoso, e 50 aso) E le manaomia ona fa'amlamalama le uiga ua tu'uina mo lau Susuga, ae fa'apu'upu'u i le lima sefulu aso o le 'auina ifo o le Agaga Paia. O le a le Penetekoso? O le 50 aso mai le toetu o Iesu i le afio ifo o le Agaga Paia.

A'OA'OGA - Afai e te manatu e fai se a'oa'oga mo tamaiti, ua lelei tele lea, fa'aata i ai le fesoasoani silisili lea mo i tatou ma tagata uma i taimi uma ma aso uma. Ae ou te taofi afai e maua fesili ua tu'uina atu, o le taua lena ma le a'oa'oga ua maua e fanau.

PESE – Ia fai ma vasa'i le a'oina o fesili i ni nai pese ta'i tasi fuaiupu ma toe amata, ina ia aua nei 'iva pe augata le taumafai o fanau. Saili lava i ni auala e le fia momoe ai i latou, ona maumau lea o lou tautiga. E mafai foi ona fai ni fa'amalosi tino e to va ai le mataupu, ae fua lava i le taimi.

Malo le galulue, manuia tele le Aso Sa o le Penetekoso
 //////////////////////////////////////

ASO SA - IUNI 04, 2023

MATAUPU – “E SAUNIA MAI E LE ATUA MEA’AI TATOU TE A’AI AI.”

TUSI FAITAU – I Tupu 17: 1-7

SINI – Ia a'oa'oina tamaiti, o le Atua lava na te foa'iina mai ia i tatou o mea'ai o lo o tatou a'ai ai.

FESOASOANI MO FAIAOGA:

O lo o taumafai lenei tala, e soloia le talitonuga ma soloia tapuaiga ia Pa'ala. Ae ia iloa ma malamalama Isaraelu i lo latou Atua moni e to'atasi. O oreva, o le manulele itiiti o le foafoaga a le Atua e foliga fa'atau+va'a, ae na te fa'aogaina lava e fai ma ana mea faigaluega. O le fesili: ***O le fea na 'aumai ai e oreva areto ma a'ano o manu na fafagaina ai Elia? O le tali: O le malosi lilo o le Atua ma ana fuafuaga mamana e le mafaia i se iloa o se tagata. O le fa'aailoga foi lena o le moni o le Atua o Elia.***

FESOASOANI MO LE MATAUPU:

O le tatou mataupu i lenei Aso Sa, “E saunia mai e le Atua mea'ai tatou te a'ai ai.” O a mea'ai sa outou a'ai ai anapo? O fea na 'aumai ai a outou mea'ai? O le a se aoga o mea'ai mo outou?

Tou te iloa tamaiti, o mea'ai uma na sa outou fa'alauina mai, o meaalofa uma na e foa'i mai e le Atua mo tatou.

O Elia, o ia o le Perofeta a le Atua i le taimi a'o avea A'apo ma tupu o Isaraelu. O le tupu lenei ma lona to'alua o lesepela, na ta'ita'i seseina ai le nu'u o le Atua ma ua tapua'i ai i le atua o Saitonu. O **Pa'ala** o se fa'atagata na faia e tapua'i iai Isaraelu. O le agasala lea na mafua ai ona oge le nu'u, ua leai se suavai, ua le tafe vaitafe aua ua taofia e le Atua le timu, aua ua tapua'i ia Pa'ala. O le finagalo o le Atua, o le a oge ma le toe iai se timu. Ma ua fa'apena ona logoina loa ia Elia, ma ta'u atu ai e Elia i le nu'u. Na matua o'o le ita o A'apo ia Elia ma ua fia fasioti ai loa A'apo ia Elia. Na silafia e le Atua lea mea, ona ia vala'au ai lea ia Elia e tu'ua lea nu'u ae alu i le alia i Kirita ma lafi ai, ae na'o le pau lena o le vai o lo'o iai sina vai e inu ai. Na usita'i Elia ma alu loa ma lafi i le alia, o i'ina o le a fafaga ai e oreva i a'ano o manu fasi, ma areto, e inu foi o ia i suavai o le alia o Kirita. Na fa'apena ona fai e Elia ua nofo nei na'o ia, ua leai sona fa'amoemoe, ae ua silasila pea le Atua ma alofa ia te ia, ua fa'aaogaina ai oreva ua fafaga i lana auauna, na o le o lava o oreva ma o mai ma a'ano o manu ma tu'u ia Elia, ma fa'asaga atu Elia ua fai ai lana mea'ai.

Tamaiti, o ai na fafaga ia Elia? Ioe, o le Atua, fa'aaoga e le Atua ana foafoaga pei o manu e na te 'aumai mea'ai mo Elia. Tamaiti, e fa'apena tatou, e mafai ona fafaga tatou e le Atua, ae auala ese'ese mai lona finagalo. Va'ai foi i tatou, tatou te le o fia a'ai ma su'e mea'ai i si o tatou atunu'u, o le fa'ailoga lena o lo'o fafaga pea i tatou e le Atua e le aunoa.

FA'ATINOGA O LE MATAUPU:

1. le taulogologo atu lava i lenei vaega fa'amolemole, ia aua ne'i taofia le faitauga Tusi Paia a le fanau. E leai foi se tuao'i pe afai e te fa'asili atu le faitauga i lo fuaiupu ua tu'uina atu mo le mataupu, o se fa'ailoga lelei lea o le alofa i le faitau a tamaiti.
2. la saunia ni fesili mai le mataupu e fesiligia ai le fanau i sa latou fa'alogoma ma taofi le mataupu.
3. Fa'amolemole ia fa'amatala manino ma faigofie le fa'amatalaina o le tala, aua le tu'ua ni au taga pe a talafeagai ai, aemaise lava o lou si'ufofoga e momoli ai le mataupu.
4. Tautuana lava le gagana ia faigofie ma ia e fiafia i le momoliina atu o lau lesona, sa e gapatia ai i le tapenaina i le vaiaso.

GALUEGA FA'ATINO: TA'ALOGA – FA'ATUMU UPU I AVANOAA.

Ia tusia i se siata ni fuaiupu se lua pe tolu o le tusi faitau, ia fa'a-avanoa ni upu e fa'atumu e le fanau, ona toe faitau atoa lea o fuaiupu. Afai e tuai ona maua, ona fa'aaoga lea o le Tusi Paia, e le afaina lea. O le tamaitiiti e tele ana upu sa'o e maua, o ia lena ua malo. E fua le umi o le ta'alogaa i le taimi.

A'OA'OGA – Fa'amolemole ua e silafia lelei ni a'oa'oga faigofie mo le fanau mai le matuapu sa talanoaina. Momoli atu mo nai fanau fa'amolemole ia laulelei ai i latou I lenei Aso Sa.

PESSE: O le isi lava lea vaega o lau tapenaga o le vaiaso, o le saunia lea o se pese mo le mataupu, afai e galo, fa'amolemole fa'amanatu se pese e te silafia e maua uma e tamaiti.

Malo le galulue, fa'amanuia atu le Atua



ASO SA - IUNI 11, 2023

MATAUPU – “NA FAFAGA E IESU TAGATA E TO’ATELE.”

TUSI FAITAU – Ioane 6: 1-4

SINI – Ia a’aoa’oina tamaiti, e le gata e saunia e le Atua mea’ai e a’ai ai tagata, a’o mea’ai foi na te saunia e lava ma totoe e le uma.

FESOASOANI MO FAIAOGA:

O se tasi lea o fa’ailoga na faia e Iesu tatou te ofo tele ai. O lona fafagaina o tagata e to’atele i ni nai mea’ai itiiti, ae mao’ona ma totoe pea. O se ata taua lena o lona alofa fa’asoa mai mo i tatou. O nai areto karite e lima ma i’a e lua, fa’aopoopo iai ma le alofa le uma o Iesu ua lava ma totoe. E moni ma fa’amaoni Anetere’a pe a fua i la tatou tau fa’a-le-tagata, peita’i, o lo’o ia le iloaina le alofa fa’asoa o Iesu. E fa’apena foi Filipo i lana tali, e le lava tupe e luaselau. E itiiti foi lona fa’atuatua i le alofa e lava ma totoe o Iesu.

FESOASOANI MO LE MATAUPU:

Tamaiti, o le a le tatou mataupu i le Aso Sa ua tuana’i? E iai se tamaititi na te iloaina. Ioe, o le tatou mataupu i le Aso Sa ua tuana’i o le, “E SAUNIA MAI E LE ATUA MEA’AI TATOU TE A’AI AI.” Ae o le tatou mataupu i lenei Aso Sa, e toetiiti lava tali foliga tutusa ma le mataupu o lenei taeao e fa’apea; “Na fafaga e Iesu tagata e to’atele.” Na o’o i se tasi aso o lo o fealua’i pea Iesu i lana galuega tala’i i le nu’u o Kalilaia, ae na fa’apena foi ona mulimuli atu uma iai le motu o tagata e to’atele se’i fa’alogologo i a’oa’oga, aemaise o le to’atele o le ‘au mama’i e fia o e fa’amalolo e Iesu. Ua alu Iesu i le mauga ma ua nofo ai i lalo ma le ‘au so’o. Ua tilotilo atu Iesu i le to’atele o tagata o lo o lolofi mai ma tutu solo mai, ona oso ai lea o lona alofa i tagata, ona ua ia silafia, ua fia a’ai le to’atele o i latou. Sa fesili Iesu i lona ‘au so’o, po’o fea e aumai ai ni mea’ai e a’ai ai le anoano o tagata. Peita’i, na tali Filipo, e le taitai lava tupe e 200 e fa’atau ai ni mea’ai aua e to’atele naunau tagata. E le taitai ona tofu mea’ai e maua i le lua selau.

Na vala’au lea o Anetere’a, o lo o iai se tamaititi e iai ana areto e lima ma i’a e lua lau, ae le taitai foi lava mo nei tagata e to’atele. Na fa’atonu loa e Iesu ona so’o e fai i tagata e nonofo i lalo ae aumai ia te ia i’a e lua lau. Na ona tago atu lava o Iesu ua tofitofi ma fai atu i lona ‘au so’o e tufa atu i tagata, o le a le mea ua tupu, ua tofu le to’atele o tagata, ua mao’ona ma ua totoe le anoano o mea’ai. Ua fa’apotopoto e le ‘au so’o mea’ai ua totoe, ua atoa ai ‘ato e sefulu ma le lua. O le aofa’i o i latou na a’ai i nei areto e lima ma i’a e lua lau, e lima afe tane po’o tama, ae le’i faitaulia ai fafine ma tamaiti.

Tamaiti, e ‘ese le to’atele o tagata sa latou fa’aaogaina areto e lima ma i’a e lua a ea? Ae a la tatou, e le tofu ni tagata se to’atele i se falaoa se tasi a ea? A’o Iesu ua na o ia lava e mafai ona faia so’o se mea, na o Iesu foi na te mafaia ona fafaga i tatou i se auala fa’apena aua o lona alofa fa’asoa mai mo i tatou e lava ma totoe. Tamaiti, e lava le alofa o le Atua mo i tatou uma lava.

FA’ATINOGA O LE MATAUPU:

1. Ia faitau ma fa’amalamalama le Tusi Paia fa’amolemole

2. Fautua atu aua le tu'ua nai fanau e te maitauina e telegese la latou faitau, ae fa'amalosi ma u'una'i pea, aua e te fai mea ita fa'amolemole.
3. Afai foi e te naunau pea ia fa'alelei le faitau Tusi Paia a le fanau, ia fa'aaoga se taimi umi o le a'oga e faia ai, o se mea lelei tele lea. E mafai foi ona taito'alua tamaiti ae feauaua'i i laua e faitau e le mea ai i lau Susuga pe a sasi sana upu e faitau.
4. E pule pea lau Susuga, a'o le fa'amalosi lava ia tautuana lau tapenaga i le vaiaso e te le masalosalo ai i lau a'oa'o atu ma leai ai se faigata o lau lesona. Mafuta pea ma le tusi faitau o le fa'avae lena o le a'oa'oina o le tala.

GALUEGA FA'ATINO:

Pe afai e maua, fa'amolemole ia saili ane se ata lapoa o le vavega lea a Iesu e fa'amatamata ai tamaiti, ma latou iloa ai le moni o le tala lea sa e fa'amatalaina. Ae afai e leai, ona saunia lea o ni fesili masani o le tala lea mo tamiti, ae saili ane e le fanau i le Tusi Paia fuaiupu o lo'o maua ai tali o fesili.

A'OA'OGA – Ia fa'amautu i le fanau, o le Atua e lava ma totoe lona alofa tunoa e saunia ai mea lelei uma, e malie ai o tatou mana'o. Fa'aopoopo ane ma nisi a'oa'oga mai le tala fa'amolemole.

PESE – E le fa'amalosi le i ai o se pese pe leai, a'o le fa'amoemoe o le vaega lea, ia atia'e fa'atasi ai le pese ma le a'oa'oina, o vaega o le ola fa'aleagaga o le tamaitiiti. Saunia pea se pese faigofie mo le fanau, ma fa'ai'u loa i le tatalo a le Alii.

MALO LE ONOSA'I, FA'AFETAI TELE LE FA'AMALOLOS
 //////////////////////////////////////

ASO SA - IUNI 18, 2023. "ASO SA TAMA"

MATAUPU – "NA MAFAI E ELISAIA ONA FA'AOLA LE TAMAITIITI NA OTI"

TUSI FAITAU – II Tupu 4: 32-37

SINI – Ia iloa ma a'oa'oina le fanau e mafai foi e tama ona fa'aolaina tagata i le finagalo alofa o le Atua i lana galuega fa'aola mo tagata uma.

FA'AMANUIAGA MO LE ASO SA O TAMA:

Avea ia lenei avanoa e momoli atu ai fa'amanuiaga ma alofa'aga mo outou uma o tama i totonu o 'aulotu uma o le Ekalesia. Fa'apitoa alofa'aga ia te outou uma, Susuga i tama toeaia ma Fa'afeagaiga, aemaise o tama uma o lo'o gapatia i lenei galuega fita o le a'oa'oina o fanau ma tupulaga i le Aoga Aso Sa ma Autalavou i totonu o 'aulotu ta'itasi. Malo le onosa'i, fa'afetai lo outou tautiga aua fanau a le Ekalesia ma tatou uma. FA'AFETAI, FA'AFETAI, FA'AFETAI TELE LE GALULUE. Fa'amanuia pea le Atua i lo outou soifua ofoina mo le galuega, fa'afetai tele le lagolago mai. Manuia lo outou Aso Sa fa'apitoa lenei. ALOFA'AGA MA FA'AMANUIAGA MAI LE FA'ATONU MA LE OFISA O A'OA'OGA KERISIANO.

FESOASOANI MO LE MATAUPU:

O ai foi Elisaia tamaiti? O le Perofeta a le Atua, po’o le auauna a le Atua. E i ai se isi o le tatou nu’u e igoa ia Elisaia. Lelei, o Elisaia lea o le a tatou talanoa iai, o Elisaia lea o lo’o ta’ua mai i le Tusi Paia. Tamaiti, fai fa’atasi mai le igoa o le tamaloa o..... Elisaia..... Elisaia.....O le tala o le a tatou talanoa iai, o le toe fa’aolaina e Elisaia o le tama a le fafine Sunema na oti. E fa’aaogaina e le Atua tama e fai ma fa’aola i lona lava finagalo alofa.

O ai la se isi e mafai ona sipela mai le igoa Elisaia, ioe, fai fa’atasi E-L-I-S-A-I-A. Fai mai le tala, sa nonofo i se tasi nu’u se ulugali’i ma se la tama e to’atasi. O lenei tamaitiiti sa fiafia tele iai ona matua aua na o le to’atasi lava ia. I se tasi aso a’o galulue tama i lana fa’atoaga, ae o lo’o fa’apena ona galue foi le tina i ana galuega masani i le fale. O se aso lagi lelei ma susulu manaia le la. A’o iai le tamaitiiti i le fanua, sa ia fa’alogoina na tiga lona ulu, na ia tamo’e loa i lona tama ma tauvala’au, “Auoi lou ulu e, auoi lou ulu e, ua tiga lo’u ulu.” Sa tagi le tama ona o le tiga tele o lona ulu. Sa tuli loa e lona tama se tasi o lana aufaigaluega e ave lona atali’i i lona tina, sa fa’apena ona si’i mai e le tina a’o vili pea i lona ulu. Peita’i, na oti lava le tamaitiiti pe a ma le itula e sefulu lua.

Sa tagi ma le fa’anoanoa le tina, sa fa’ata’oto ia te ia ona vala’au lea i lona to’alua e sau se taule’ale’a ma se asini e ave le tama ia Elisaia le tagata o le Atua. Sa fa’anoanoa le tama ona o le oti o lona atali’i, peita’i, ua alu le fafine ia Elisaia ua logo iai le mea ua tupu, ma ua la o mai ai loa ma Elisaia ma fa’asasa’o atu i totonu o le potu o lo o ta’oto ai le tamaitiiti. Na tapuni e Elisaia le potu ona tatalo lea i le Atua e fesoasoani ifo i mafatiaga o ona tagata. Ina ua uma, ona fao lea o Elisaia i luga o le tamaitiiti, o le uiga o lea mea, o le fa’amafanafana i le tino o le tamaitiiti ua oti. Fai mai na fa’apena ona fealualua’i lava Elisaia ma alu ane fao i luga o le tamaitiiti, e fa’amafanafana pea i lona tino. I le taimi lava lea na te’i a’e ai le tamaitiiti i luga ma mafatua fa’afitu, ona pupula a’e lea o ona mata ua toe ola. Ona ia vala’au ane lea i le tina e alu ane e si’i lana tama ua toe ola. Sa to’otuli le fafine ma fa’afetai ia Elisaia ona ua toe maua le fiafia ma le olioli i le toe ola o lana tama na oti.

Tamaiti, o le Aso Sa fa’apitoa lenei mo tama, o le uiga ia manatua lenei tala i lenei taeao, o le tama alofa ma loto fesoasoani. Ua liua e Elisaia le fa’anoanoa i le fiafia. E fa’apena le tama lea? E alofa lou tama ia te oe? Ae a lou tina, e alofa i ai lou tama? Ae fa’apefea isi tagata tou te le aiga, e alofa i ai lou tama? Ioe, e iai foi taimi e le alofa ai le tama pe a fa’alogogata outou tamaiti a ea? Ae ia pei outou o Elisaia le alofa ma le loto fesoasoani i le nei tina. Ia fai outou ma tama ma teine e alolofa atu ma fesoasoani i isi tagata ua mafatia ma fa’anoanoa.

GALUEGA FA’ATINO:

Fa’amolemole ia a’oa’oina le mau lea ina ia fai ma oso mo i latou i lenei Aso Sa o Tama:

FA’ATA’OTO – 1: 8 -9. “Lo’u atalii e, fa’alogologo maia i le a’oa’o atu a lou tama, aua foi e te tu’ulafoa’iina le upu a lou tina, aua e fai ia mea ma pale matagofie i lou ulu, ma mea e asoa i lou ua.

A’OA’OGA – Ia loto alofa ma loto fesoasoani i so’o se tagata, aua e fa’aaogaina ai e le Atua i tatou e fa’aola i nisi, e pei o Elisaia.

PESE – Saunia se pese mo le mataupu ma fa’ai’u ai i le tatalo e te saunia mo le Aso Sa o Tama, ma le sauni atu i le tapuaiga

MANUIA OUTOU TAMA, MANUIA LE ASO SA.
////////////////////////////////////

ASO SA - IUNI 25, 2023

MATAUPU – “SU’EGA O LE ‘AFA MUAMUA O LE TAUSAGA”

SINI – O le toe asia lea o mataupu sa a’oa’oina mai ia Fepuari se’ia o’o mai i le Aso Sa ua mavae, e te silafia ai le tulaga o lo’o iai le taumafai o nai tamaiti sa outou mafuta i le aoga.

FA’ATINOGA O LE MATAUPU:

1. Fa’amalo le galulue, fa’afetai le onosa’i, o lea lava ua tatou taunu’u mai i le toe Aso Sa lenei o le ‘afa muamua o le tausaga aoga lenei. Fa’afetai le fa’amalolosi, malo le a’oa’o.
2. le fa’amoemoe o le su’ega i lenei Aso Sa, o le a ta’oto atu lava e te saunia le fa’atinoina.
3. Fa’amolemole aua ne’i faigata ma tele mo tamaiti. E pule lava lau Susuga pe tusi pe tali gutu foi le fanau, o le mea taua ia maua se ‘ai se tasi pe lua mai mataupu sa a’oa’oina
4. Fa’amolemole ia toe fa’amanatu muamua mataupu i nai tamaiti ona amata ai lea o le su’ega.
5. E leai ni Tulafono o su’ega a le fanau, a’o le mea o lo’o fia tulimata’ina, o le a se mea taua ua maua e le fanau i nai masina ua mavae.
6. Ia tasi pe lua fesili mai le tala ua lava ma totoe, ia toe asia igoa o tagata ma toe fa’amanatu uiga o nisi igoa. Ia toe asia a latou tauloto po’o le a se tulaga ua o’o i ai e o’o mai i lenei Aso Sa.
7. Ia asia le faitau Tusi Paia, ae pule lau Susuga i se tusi e faitau.
8. E tele pea mea taua e tataua ona toe fa’amanatu ma talanoa ai i tamaiti, e te maitauina ai le gasologa mo le ‘afa mulimuli o lo’o agai mai.
9. Fa’aaoga uma le taimi o le aoga fa’amolemole e fa’ato’aga ai nai fa’amanatu i fanau ia manatua ai pea tala ma lesona sa outou galulue ai.
10. Afai e te finagalo e togi taumafaiga a le fanau ua lelei tele lea, ae tautuana ia fa’afiafia tamaiti i lou fai atu e sili uma i latou,
11. Afai ua e fiafia tele i le fanau, fai loa ni nai pesepesega e fa’agaoioi ai i latou, fa’ai’u i sina keke ma se aisakulima, ia ua uma le case. Sauni loa e momoe i le lotu. Fai atu ai foi.
12. Tautuana ia fa’ai’u i sau fautuaga i fanau ina ia mata’alia i le tu’uaga i lavea se isi, pe gasegase foi. Nonofu i le fale ma faitau Tusi Paia pe a leai ni mea e o i ai, Aua le osovale ae le iloa e matua.

UPU FA’AI’U: E toe momoli atu le fa’afetai tele lava i a outou Susuga i Faiaoga mo le galuega fita o le ‘afa muamua o lenei tausaga ua mavae. Fa’afetai le alolofa i fanau, o le upu moni lava, ua ofo lava lo outou soifua e lagolago atu i le ‘au Faigaluega, aua fanau ma tupulaga i ‘aulotu taitasi o le Ekalesia, ia aveia pea i latou ma tupulaga e fiafia mai iai le Alii. Ia fa’amanuia tele atu le Atua ia te outou uma o Faiaoga o le Aoga Aso Sa,

**IA MANUIA TELE LE TU’UAGA MA LE MALOLOGA – TATOU TOE FEILOAI IA AUKUSO PE A PULE
ALOFA LE ATUA TATOU TE AULIA ATU. – ALOFA TELE ATU MO OUTOU UMA.
////////////////////////////////////**

**FA’ASOLOGA O MATAUPU
FEPUARI 05, 2023 – IUNI 25, 2023.**

<u>ASO/MASINA</u>	<u>MATAUPU</u>	<u>TUSI FAITAU</u>
1. Fepuari 05, 2023	“Na faia e e Atua le lagi ma le lalolagi “	Kenese – 1: 1 – 31.
2. Fepuari 12, 2023	“Na faia le tagata I le fa’atusa o le Atua “	Kenese – 1: 26 – 31/2: 7
3. Fepuari 19, 2023	“O uluai matua ma le fa’atoaga o Etena”	Kenese – 2: 21 – 24
4. Fepuari 26, 2023	“MATAUPU FA’AMANATU”	
5. Mati 05, 2023	“O le la’au e iloa ai le lelei ma le leaga”	Kenese – 3: 1 – 3
6. Mati 12, 2023	“O le fa’aosoosoga”	Kenese – 3: 1 – 6
7. Mati 19, 2023	“Ua pau’u Atamu ma Eva”	Kenese – 3: 7 – 13
8. Mati 26, 2023	“O fa’asalaga ma le fa’aola ua folafolaina”	Kenese – 3: 14 – 24
9. Aperila, 02, 2023	“Osana I le Alo o Tavita” (Aso Sa Laupama)	Mataio – 21: 1 – 8/Luka – 19: 38
10. Aperila 09, 2023	“O le fa’aaliga o Iesu ia Maria le Makatala” (Aso Sa O le Eseta)	Ioane – 20: 1 - 18
11. Aperila 16, 2023	“Ua fa’aali Iesu i le to’asefulu, e le o i ai Toma”	Luka – 24: 36 – 43
12. Aperila 23, 2023	“Ua fa’aali Iesu i le to’asefulu ma le to’atasi, ua i ai ma Toma”	Ioane – 20: 24 – 29
13. Aperila 30, 2023	“MATAUPU FA’AMANATU”	
14. Me 07, 2023	“O le tina loto fesoasoani ma le alofa”	Iosua – 2: 1 – 7
15. Me 14, 2023	“O le fafine mativa ma lana taulaga i toe tupe” (Aso Sa o Tina)	Mareko – 12: 41 – 44.
16. Me 21, 2023	“Ua afio a’e Iesu i le lagi”	Galuega – 1: 1 – 11
17. Me 28, 2023	“O le Agaga Paia le Fesoasoani sili” (Aso Sa Penetekoso)	Fesili Tusi Fesili a tamaiti
18. Iuni 04, 2023	“E saunia mai e le Atua mea’ai tatou te a’ ai ai”	i Tupu – 17: 1 – 7
19. Iuni 11, 2023	“Na fafaga e Iesu tagata e to’atele”	Ioane – 6: 1 – 4
20. Iuni 18, 2023	“Na mafai e Elisaia na fa’aola le tamaitiiti na oti” (Aso Sa o Tama)	ii Tupu – 4: 32 – 37
21. Iuni 25, 2023	“SU’EGA O LE ‘AFA MUAMUA O LE TAUSAGA” (Manuia le tu’uaga)	

